

DS

735

A2C43

1790

v. 9



咳餘叢考卷二十六

陽湖 趙翼 耘崧

翰林

翰林之名本於揚子雲長楊賦所謂子墨客卿問於翰林主人蓋謂文學之林如詞壇文苑云爾古未有以此爲官名者其設爲官署則自唐始然唐時翰林本內廷供奉之名非必皆文學也舊唐書百官志翰林爲詞學經術及僧道祝卜等待詔之所高宗時劉禕之等以文詞召入待詔時號北門學士元宗時張說陸堅張九齡張垺等亦召入謂之翰林供奉凡表疏批答或詔從中出宸翰所揮亦資其檢討此翰林名官之始也

吳通元傳載陸贄疏

言承平時工藝書畫皆待詔翰林而無學士至德以來命集賢學士入禁中草書詔待進止於翰林院因以各官則翰林學士又自至德中始然葉石林云唐之翰林開元以前未有學士之稱曰翰林待詔曰翰林供奉開元二十六年始改供奉爲學士以張拍等爲之與舊唐書百官志相合則翰林之有學士實始於開元而非始於至德當其初設翰林本以便於燕私游藝凡技術之士

皆在焉學士亦技術之一故亦待詔於此其後以撰擬詔命得參機務遂別爲清要之極選然其時翰林猶有雜流如天寶中有嵩山道士吳筠乾元中有占星韓穎劉烜貞元中有弈棊王叔文侍書王伾元和末有方士柳泌浮屠士通皆待詔翰林柳公權亦充翰林書詔學士又順宗本紀罷翰林醫工相工占星射覆冗食者四十二人沈括所謂工藝羣官皆稱翰林是也遼宋以來尙仍其制遼本紀有翰林茶酒使宋史安忠掌翰林司

內衣庫提點醫官院韓顯符善占候詔官翰林天文錢惟演工書太宗命翰林書學賀正顯至其第取之本紀雍熙四年校醫人優者爲翰林學生元豐四年改翰林醫官院爲醫官局大觀三年詔醫學併入太醫局書入翰林書藝局畫入翰林畫圖局是宋時翰林亦尙沿唐制雜藝皆居之其專以處文學之士則自明始

學士

學士之名其來最久裴松之三國志註正始中詔議園丘普延學士是曹魏時已有學士之稱也晉宋以後增置漸多宋泰始六年置總明觀學士後省總明觀於王儉宅開學士館以總明四部書充之齊高帝詔東觀學

士撰史林三十篇永明中置新舊學士十人修五禮又
竟陵王子良集學士抄五經百家梁武時沈約等又請
五禮各置舊學士一人人各舉學士二人相助又命庾
肩吾劉孝威等十人爲高齋學士簡文爲太子又開文
德省置學士劉孝標撰類苑梁武又命諸學士撰華林
徧略以高之陳武帝亦詔依前代置西省學士其他散
見於南北史各傳者如虞荔張譏俱爲士林館學士蔡
翼紀少瑜庾信爲東宮學士傅縡顧野王阮卓爲撰史
學士沈峻孔子祛爲西省學士陸琰沈不害爲嘉德殿
學士岑之敬爲壽光殿學士阮卓又爲德教殿學士是
六朝時或省或觀或殿或館隨所用各置學士第其時

所謂學士者無定員無定品隋書柳詒傳晉王廣招文學之士百餘人充學士以師友處之於時諸王皆有學士晉王廣以庾自直爲學士秦王俊以潘徽爲學士此藩王亦得置學士也韋孝寬傳孝寬雖在軍中篤意文史末年患眼猶令學士讀而聽之是節帥亦得置學士也隋文帝令段文操督秘書省學士文操性剛嚴學士頗存儒雅文操輒鞭撻之前後或至于數則學士且不免受撻矣蓋其時所謂學士不過如文人云爾唐太宗爲天策上將軍時以司勳郎中杜如晦考功郎中房元齡軍諮祭酒蘇世長等十八人以本官兼學士司勳考功等其官也學士則總名也卽位後置宏文館悉引

學士番宿更休參帷幄論文史其職漸重乾封以後范履冰等爲學士撰擬詔敕地益清要然通考謂宏文集賢學士分屬中書門下則猶有所屬也至開元改翰林供奉爲學士別建學士院於翰林之南已與翰林分爲二然以翰林近御清切故猶冒翰林之名于是有翰林學士官名其職乃專掌制詔時以爲天子私人號稱內相至德以後又於學士中擇年深望重者一人爲承旨往往至宰相於是學士遂爲公輔之先路矣至學士品級之高下則累朝各不同通考云唐之翰林學士只取文學之人隨其官之高卑入院者皆爲學士廷覲之際則各隨其元官立班而學士未嘗有一定之品秩也今

按唐書高璩傳云璩以翰林學士擢諫議大夫近世學士超省郎進官者惟鄭顥以尙主璩以寵升云是學士尙不得遽遷省郎又陸贄以翰林學士從奉天及歸遷中書舍人後以兵部侍郎復爲學士李吉甫以考功郎中入翰林爲學士遷中書舍人可見學士本無定品至宋始定制資淺者爲直院暫行者爲權直而真爲翰林學士者職獨顯矣金初翰林學士承旨正三品貞祐三年陞從二品翰林學士正三品侍讀侍講學士俱從三品直學士從四品待制正五品元制承旨從一品學士正二品侍講從二品直學士從三品待制正五品修撰從六品明洪武初定翰林院承旨正三品學士從三品

侍讀學士正四品侍講學士從四品直學士正五品十四年革承旨及直學士定學士爲從五品十五年設殿閣大學士亦正五品永樂中定大學士班在翰林學士之上

侍讀侍講學士修撰編檢

石林燕語謂咸平中始置翰林侍讀學士以楊徽之爲之又置翰林侍講學士以邢昺爲之王阮亭香祖筆記引爲講讀學士之始

亦見宋史真宗本紀又夏侯嶠傳真宗二年始建講讀之職命嶠爲翰林侍讀學士

然通

考開元十三年置集賢院侍講學士侍讀直學士唐書鄭朗爲侍講學士則講讀學士實自唐始也至講讀之名本起於東漢桓榮薦門下生侍講乃聽榮出桓郁以

少府再入侍講黃瓊以選入侍講禁中

俱見後漢書

此侍講之

始也及六朝則又有侍讀爲東宮官屬南史到洽與陸倕對掌東宮管記俄兼侍讀陳天嘉中詔顧越侍東宮讀尋遷羽林監侍讀如故又江泌爲永康王侍讀傅昭爲南郡王侍讀北史周文帝以薛慎爲宜都公侍讀此皆唐以前侍讀之官唐書陸質爲太子侍讀宋史真宗時馮元爲翰林侍讀馬宗元爲翰林侍講俱不帶學士此又近代翰林侍讀侍講之始也修撰之官唐時亦已有之舊唐書百官志有國史修撰官學士院亦有修撰官裴坦常爲史館修撰宋史哲宗元祐六年置國史院修撰官是唐宋以來國史院學士院俱有此官非專以

屬廷試之第一人也至有元張起巖以進士首選特旨
改集賢修撰此爲狀元授修撰之始耳續通考謂編修
本樞密院官元時始改爲翰林之屬又至正中因學士
巖巖言改奎章閣爲宣文閣藝文監爲崇文監置檢討
官十六員以爲近代編修檢討之始按舊唐書學士院
修撰之下有校理官檢討官王彥威以淹識典禮由太
常卿特令補檢討官宋史國史院有編修官樞密院有
檢討官又有官制局檢討官畢仲衍嘗爲之文文山紀
年錄登第後爲國史院編修官實錄院檢討官金史移
刺履爲國史院編修官則編檢二職唐宋已有之亦不
自元始

唐時翰林學士不必皆進士出身

唐時翰林學士據通考云只取文學之人各隨其官之
崇卑入院者皆爲學士官尊者號稱內相可以朝夕召
對參議政事或一遷卽爲宰相其孤遠新進或起自初
階或元無出身至試合草麻甚者試以詩賦如試進士
之法其人皆呼學士又云自諸曹尙書以下至校書郎
皆得與其選是唐之翰林學士雖無出身者亦得爲之
其以他官入者亦不必皆由科目今按李德裕以蔭入
官後擢翰林學士知制誥劉鄴由幕僚擢左拾遺尋爲
翰林學士吳通元及弟通微以太子友召爲翰林學士
鄭覃以蔭補校書郎後爲翰林侍講學士鄭朗由辟署

幕僚亦爲侍講學士王叔文以棋待詔後爲翰林學士
是皆不必進士出身也

翰林撰文署名

唐書蘇頲傳元宗愛頲文謂之曰卿所爲詔令別錄副
本署臣某撰朕當留中後遂爲故事後世翰林撰文例
書名以進其昉此歟

庶吉士

庶吉士自明初始然不僅作翰林院官也洪武初有六
科庶吉士十八年選進士在翰林院及承敕監等近侍
者俱稱庶吉士二十一年以進士解縉爲中書庶吉士
是六科及承敕監中書俱有庶吉士矣永樂二年旣授

一甲三人曾棗周道孟簡等官復命於第二甲擇文學
優者楊相等五十人及善書者湯流等俱爲翰林院庶
吉士繼又命解縉等選才資英敏者就學文淵閣共二
十八人周忱自陳年少願學帝喜增爲二十九人閱三
年試之其留者二甲授編修三甲授檢討不得留者卽
爲給事中御史及州縣等官於是庶吉士遂專屬翰林

張益王勳皆永樂十三年進士益由庶吉士授中書舍人
勳由庶吉士授大理寺丞則庶吉士亦有改授小京官者

其後每科所選

多寡無定永樂十三年選六十二人宣德二年止選邢

恭一人又或數科不選有時合數科通選

蕭鎡成進士需次
於家宣宗命三科

進士選二十八人
爲庶吉士鎡與焉

至宏治四年給事中涂旦以累科不選庶

吉士請循祖制行之大學士徐溥乃言自永樂以來或

間科一選或連科屢選或合數科同選初無定限或內閣自選或禮部選送或會同禮部同選亦無定制請自今每一次開科卽一次選用令新進士錄平日所作雜文呈禮部送翰林考閱後按號行取禮部以糊名試卷偕閣臣出題考試試卷與所投之文相稱卽收入選每科不得過二十人孝宗從其請著爲令

按宋制將試館職則先命從官各以平日所爲

文五十篇送學士院選擇而後名試

此又每科館選之始也其教習庶吉士始

于正德中命學士爲之

選舉志謂以翰林資深者一人課之

萬歷以後掌教習

者專以吏禮二部侍郎二人爲之

明史選二志嘉靖八年帝親閱廷試卷手批一甲羅洪先楊名

歐陽德二甲唐順之陳東任瀚六人對策各加評獎大學士楊一清遂選順之等二

一人爲庶吉士忽有旨庶吉士之選邇來大臣徇私植黨無益於國其事遂止且十

一年乃

復舉行

前明翰林不必皆由庶吉士

明史選舉志自洪武十八年廷試擢一甲進士丁顯等爲翰林院修撰二甲馬京等爲編修吳文等爲檢討進士之入翰林由此始也然明初翰林尙不必皆由科目如楊士奇以史才薦入翰林充纂修官胡儼由縣令薦入翰林鄒緝由明經擢侍講沈度沈繹以善書入翰林洊至學士劉鉉亦以善書召入翰林舉鄉試授中書舍人進侍講皆非進士也卽進士入翰林亦有不必要由庶吉士者如黃淮由中書舍人改翰林編修金幼孜由戶科給事中改翰林檢討是也自永樂中於進士榜下取翰林庶吉士仁宣間三楊當國六鉢相傳於是翰林之

官無有不由庶吉士起者惟陳繼由布衣以楊士奇薦入翰林楊翥以景帝潛邸舊恩入翰林已爲僅事天順中編修馬昇檢討傅宗皆不由科第李賢當國卽出之於外爲參議等官資格既定遂牢不可破宏治中布衣潘辰以才望入翰林一時稱異數然初入不過爲翰林待詔耳直至嘉靖中張璁桂萼等當國以已本由部曹特賜翰林學士遂停庶吉士不選而講讀編檢皆從吏部推補於是席春由他曹改用檢討張邦奇由提學改右庶子遷祭酒甚至黃綰本廕生亦以議大禮爲少詹事兼侍講學士以任子官翰林前此未有也霍韜流言自楊榮楊士奇楊溥李東陽楊廷和等專權植黨寵翰

林爲屬官中書爲門吏故翰林遷擢不由吏部而中書
至有進秩爲尙書者當時璉萼韜等持論如此然成例
猝改舉朝大譁當璉萼韜等由郎署入翰林時喬宇疏
言內降恩澤先朝僅施於佞倖小人士大夫一預其間
卽不爲清議所齒況學士最清華俾萼等居之誰肯與
同列哉可見成例相沿固難變革是以不久仍復舊例
其後文徵明以善書徵入翰林爲待詔諸詞臣以其不
由科第猶羣呼爲書博士不屑與同列直至崇禎帝以
儒臣迂緩不習吏事乃改舊例擇知推卓異者入翰林
於是汪偉以知縣得翰林見偉傳成勇以知縣得南京吏部
主事諭德黃景昉爲勇及朱天麟稱屈天麟卽得翰林

勇以先赴南京遂不復改

見勇傳

此又有明一代館選沿革

之源流也

選舉志成祖初年內閣七人非翰林者居其半翰林纂修亦諸色參用自天順二年李賢奏定纂修專選進士由是非進士不入翰林非翰林不入內閣南北禮部尚書侍郎及吏部右侍郎非翰林不任而庶吉

士始進之時已羣目爲儲相通計明代宰輔百七十餘人由翰林者十九

殿閣大學士

大學士之官起于唐舊唐書李通傳中宗景龍二年修文館置大學士四員以李嶠宗楚客趙彥昭韋嗣立爲之此大學士之始也然猶不常設明皇欲以張說爲大學士說曰學士本無大稱中宗寵待大臣始有之臣不敢冒乃免德宗欲以李泌爲大學士泌亦援張說之言力辭至崔圓又引泌語辭然陳希烈在明皇時爲崇元館大學士則張說雖嘗辭之而希烈仍爲之又姚寬西

溪叢語宋制宰相出鎮帶資政殿大學士執政無大字
蘇易簡出被遇獨厚遷紫宸殿以稱呼不使用觀文殿

因此宰執出鎮優遇者皆除之

按通考又云仁宗皇祐元年詔置觀文殿大學士寵待舊相今後須

曾任宰相乃得除

春明退朝錄唐制宰相四人首相帶太清宮使

次三相帶宏文館大學士及集賢殿大學士以此爲序

此制唐書不載

宋朝惟二相昭文首相領之集賢次相領之趙中

令雖獨相初祇領集賢久之方遷昭文據此則唐宋宰

相原帶大學士也明初仿元制設中書省置左右丞相

洪武十三年誅丞相胡惟庸後遂罷中書省政歸六部

尋置四輔官以儒士王本等爲之不久亦罷十五年始

置華蓋殿武英殿文淵閣東閣諸大學士

禮部尙書邵質爲華蓋檢討吳伯宗

為武英翰林學士宋訥為文淵典籍吳沉為東閣

又置文華殿大學士

耆儒鮑恂等為之

秩皆五

品其時所謂大學士者不過侍左右備顧問而已於機

務無與也然一日萬幾不能無贊理成祖以侍讀解縉

編修黃淮入直文淵閣又命侍讀胡廣修吳楊榮編修

楊士奇檢討金幼孜及胡儼同入直尋進廣榮幼孜俱

文淵閣大學士機務之屬大學士始此然是時大學士

仍不過五品若遷秩例須改他官不復能入直

胡儼直文淵閣後遷國子

祭酒遂不得人

故成祖特命吏部凡內閣諸臣考滿勿改他任於

是榮士奇等雖在機要終成祖世不過五品官仁宗即

位陞士奇為禮部侍郎榮為太常卿幼孜為戶部侍郎

黃淮為通政使皆仍兼殿閣大學士宣德中又皆進尚

書蓋雖居內閣而官必以尙書爲尊也其後又加公孤
銜領尙書之職地旣清要兼官又尊於是大學士亦遂
忘其原品本卑而隱然鈞衡之重與百寮殊矣然此猶
皆從翰林入內閣旣入後以年勞游陞侍郎尙書未有
旣爲侍郎尙書而入閣者宣德中陳山張瑾皆以尙書
兼大學士不久仍罷正統景泰中苗衷高穀俞剛江淵
等以侍郎入王文以左都御史入宏治中邱濬以禮部
尙書入尙書入閣
自濬始自是大學士遂爲侍郎尙書遷階矣按景
泰帝
彭時猶以修撰入閣天順
初岳正亦以修撰入閣

又前明大學士皆翰林出身蓋自永樂中黃淮胡廣
等入直本皆詞臣正統中三楊已老所汲引馬愉著

彛等亦皆由翰林入自是沿爲故事入閣未有不由翰林者明史張至發傳非翰林入閣者自世宗朝許讚後至崇禎中至發始以外僚入今按李賢由進士授吏部主事本非翰林英宗時兼翰林學士入閣則世宗以前亦有非翰林而入閣者卽世宗時張璠由刑部主事夏言由給諫皆擢禮部尙書入閣則非翰林而入閣者亦不止讚一人第此數人係偶然破例其餘仍未有不由翰林者故相沿以內閣爲翰林故物職官志云嘉隆以前文移猶稱翰林院以後則竟稱內閣矣並歷中內閣缺人議者謂不當專用詞臣宜與外僚并用然卒不果

見李三才傳

迨崇禎帝因鄭以偉

不嫻票擬章中何況二字誤以爲人名擬旨提問經帝改駁曰是詞臣爲帝所輕而閣臣不專用翰

林

見鄭以偉傳

閣老

閣老本中書舍人之稱今俗以稱大學士非也唐書楊綰傳綰爲中書舍人故事舍人年久者爲閣老其公廨雜料皆取五之四綰悉均給之杜詩生理祇憑黃閣老亦指嚴武非謂宰相也查初白詩自註舊傳文淵閣爲翰林內署詔冊制誥皆屬焉凡宣召文移止稱翰林院初不以內閣名每日與閣臣會食輪學士一人專掌誥敕多挨次入閣故例稱閣老蘇州有閣老坊乃吳匏庵

爲學士時所建則翰林之在文淵掌誥敕者亦得稱閣老矣

大學士到任在翰林院

明史錢幹傳宣德七年以故鴻臚寺爲翰林院落成諸

殿閣大學士皆至錢幹不設楊士奇楊榮座或問之傳維麟明

書楊榮作楊溥

曰此非三公府也二楊以聞上命工部具座禮部

敘位次二楊始自內閣出坐諸學士上亦見玉堂叢語按王阮亭

記明洪武十五年設內閣大學士命皆于翰林院上任

十八年又命殿閣大學士左右春坊大學士俱爲翰林

院官故院中設閣老座於上而掌院學士反居其旁諸

學士稱閣老曰中堂據此則閣老到任之在翰林院洪

武時已有定制宣德距洪武不遠何以錢幹不設閣臣座耶豈洪武舊制在南京此以鴻臚改翰林在北京爲創舉遂不援故事耶然阮亭謂閣老稱中堂以其座在翰林之中則非也按湘山野錄錢希白見王欽若戲曰中堂遂有如此宰相又邵氏聞見錄富鄭公與康節食筍公曰未如中堂食筍之美又元王惲有中堂事記記元初中書省之事則宰相之稱中堂宋元已然固不因設座於翰林之中也

中書

中書之名漢武初以宦者爲之司馬遷被刑後亦爲中書令蓋主傳宣詔命者也成帝紀罷中書宦官註臣瓚

曰漢初中人有謁者令孝武加中謁者令爲中書謁者
令置僕射宣帝時任中書官宏恭爲令石顯爲僕射元
帝時恭死顯代爲中書令專權用事成帝時因蕭望之
言乃罷其官更名爲中謁者令云自是以訖東漢皆無

中書之官

後漢書朱暉傳漢家舊典置侍中中常侍二人省尚書事黃門侍
郎一人傳發書奏皆用姓族士人和熹太尉以女主稱制乃以閹人

爲中書侍中黃門通命自此以來權過人主然則
東漢雖無中書之官侍中中常侍卽其職也

曹操爲魏公以劉放孫

資爲秘書郎文帝卽位更秘書爲中書以放爲監資爲
令遂掌機密明帝益任焉魏志稱三祖詔命皆放所爲
此中書參機務撰詔旨之始也其時中書監令號爲重
任蔣濟諫曰今外所言輒云中書雖使恭慎不敢外交
但有此名猶惑世俗况實據事要日在目前倘因疲倦

之間有所革制衆臣見其能推移於事卽亦因而向之
按資放名臣明帝令主而濟已有此奏可見權之所在
勢卽隨之故晉荀勗由中書監除尙書令或賀之而勗
有奪我鳳池之嘆至晉惠帝時孫秀爲中書監王威爲
中書令權傾中外則更任之極重者矣
唐初政事堂在門下省長孫無忌以司空房元齡以
僕射魏徵以太子太師皆知門下省事至裴炎以中
書令執政事筆乃徙政事堂於中書

中書舍人

中書舍人其始甚微孫資旣老致仕齊王芳特爲置舍
人官騎是本供中書監令之役使者也

按舍人之名戰國已有
之史記嫪毐幸時諸客

求爲舍人者以千數李斯爲呂不韋舍人漢書高祖紀舍人陳恢註師古曰舍人親近左右之通稱也齊食其以舍人侍呂后在楚軍中晉王詵告老武帝亦爲置舍人六人以六朝以來漸爲寵要通考云宋初置中書通事舍人四員入直閣內出宣詔命凡有陳奏皆舍人持入參

決於中齊永平中舍人四員各住一省謂之四戶權傾天下茹法亮久爲舍人嘗語人曰何須覓外祿此戶內年可辦百萬及出爲大司農猶戀戀垂泣而去傅昭爲中書通事舍人時居此職者權勢最盛昭獨廉靜一無所預明帝以爲有古人之風梁陳時中書舍人五人領中書十人書吏百二十人分掌二十一局各當尙書諸曹並爲上司尙書惟聽受而已可見其地望之切要也唐初詔敕猶是舍人專掌自永淳以來此職爲文士之

極選裴坦傳云故事中書舍人初詣省視事四丞相送

之施一榻堂上壓角而坐其儀制之尊可知

宋史道云舍人上事曰設紫褥

于廷面北拜廳閣長立褥之東北隅謂之壓角此恐傳聞之誤

自開元後以翰林學士專掌內命

而其任稍輕故陸贄疏以爲詔命所出本中書舍人之職軍興時促迫應務權以學士代之今天下無事合歸職分其命將相制詔請付中書行遣事雖不行亦可見唐初中書舍人之本職也又按唐時有由中書舍人而爲翰林學士者如陸贄爲中書舍人權兵部侍郎復爲翰林學士是也又有由翰林學士遷爲中書舍人者沈傳師吳融常袞是也蓋其時翰林本無定品故中書舍人之職常在其上五代及宋初猶然宋史竇貞固由翰

林學士就拜中書舍人蓋猶沿唐制前明則中書舍人之官已經不過爲大學士之僚屬呂原子愆以蔭補國子生選中書舍人疏乞應試憲宗許之遂舉順天鄉試舍人得赴試自此始見明史呂原傳是舍人尙有以監生充選者及在閣年久資深每三年計典輒加兼官如尙寶卿等秩皆舍人遷階也據霍韜疏則并有加至尙書者

尙書

尙書本秦官少府之屬在內掌文書者漢因之武帝增用宦官爲中書謁者令於是尙書與中書職事多相連其時中書如唐之樞密使明之司禮監而尙書通章奏出詔命參決衆事如唐之中書門下明之內閣也宣帝

時又有中尚書見蓋寬饒及石顯傳則并用宦者兼之
元帝時石顯爲中書令五鹿充宗爲尚書令成帝之初
蕭望之領尚書事嫉顯等姦邪乃奏以爲尚書曰官之
本國家樞機宜以通明公正處之乃定置尚書員常侍
曹尚書主公卿事二千石曹尚書主郡國二千石事民
曹尚書主吏民上書事客曹尚書主外國事
光武分二千石
曹爲二又分客
其所不掌者惟刑罰有廷尉禮儀有太常軍馬有大
司馬賦稅有大司農糾劾有御史而已而尤以職掌樞
機爲清切霍光傳光死之後其家恣橫事漸露霍山猶
領尚書宣帝乃命吏民上書者不關尚書輒使中書令
取之魏相傳霍光時諸上書者皆爲二封署其一曰副

領尚書者先發副封所言不善則屏去不奏相因請去副封以防壅蔽宣帝從之董賢傳賢雖爲三公常給事中領尚書事百官皆因賢奏事王莽傳莽懼臣下擅權凡吏民上封事令宦官左右開發尚書不得知此可見平時章奏必經尚書也竇武傳武謀誅宦官事泄中官曹德請帝出德陽殿召尚書官屬脅以白刃使作詔版可見詔命亦自尚書出文心雕龍所謂兩漢詔命出自尚書也王允以宦官誅後侍中等出入禁近機事頗泄乃奏尚書不得出入及通賓客又可見尚書職在禁近故秩不高而權甚重王暢爲尚書令後拜南陽太守以尚書令本千石秩也而所掌皆機事故李固疏曰陛下

之有尙書猶天之有北斗斗爲喉舌尙書爲陛下喉舌
斗斟酌元氣運平四時尙書出納王命賦政四海也陳
忠傳三公任輕機事專委尙書而災眚變咎輒策免三
公時論不平又孔光爲尙書令凡典樞機十餘年徐防
補尙書郎職典樞機周密畏慎可見漢時尙書之職之
清要及魏晉以來有中書省而尙書之權遂移尙書職
務皆承中書下流元時猶然惟桑哥得政以尙書擅權
遂駕中書省之上桑哥敗後仍復舊明初承之明史陳
修傳六部之設始於洪武元年初尙屬於中書省權輕
多仰承丞相意旨至十三年革中書省而部權乃專此
古今尙書沿革之大略也

古來尙書祇是一省凡吏戶兵刑之類同在此一省
中各分職務非如今之分爲六署也唐楊嗣復遷禮
部員外郎因父於陵爲戶部侍郎乃請避同省以禮
戶雖分而省則同也龐元英文昌雜錄宋制尙書省
凡六曹除告身帳目外一百六十八案吏額一千四
百十三人總五司六月文書十二萬三千五百餘件
天下事莫不上於尙書是曹雖六而省則仍一其分
爲六署亦自明祖始

侍郎郎中員外

郎中本秦官國策荆軻刺秦王時諸郎中執兵者皆在
殿下史記秦趙高爲郎中令用事是也又國策朱英謂

春申君曰君以臣爲郎中可以殺李園則楚亦有是官
蓋本執兵侍衛者侍郎之官至漢始有漢百官志侍郎
郎中無定員多至千人侍郎比六百石郎中比四百石
是也員外郎隋開皇中始置諸部皆有之部或四五人
蓋以佐郎中之繁至員外之名唐時最濫不必皆尙書
官屬也其始起于宦寺而漸及於選部唐書宦官傳序
中宗時宦官七品以上員外置千員魏元忠傳亦云奄
豎坐升班秩旣無正闕率授員外乃盈千人此宦寺之
員外也李嶠傳嶠欲收時望乃奏置員外官數千杜佑
傳神龍以來選者旣無員缺則置員外官二千入自是
以爲常此選人之員外也盧懷慎傳云在京諸司員外

官數十倍近古未有魏知古傳亦云更員增諸司試補
員外檢校官已羸二千此京朝官之員外也嚴挺之盧
絢皆爲李林甫所惡用爲員外詹事則大僚亦有員外
矣肅宗乾元二年詔曰州縣見任員外官並任其所適
可用者上州不得過五人中州四人下州三人縣不得
過一人是州縣亦有員外矣羅希奭貶爲海康員外尉
姚紹之授南陵令員外置來瑱貶播州尉員外置則小
吏亦有員外矣所以唐宋以來員外之稱幾遍民間也

御史

漢百官表謂御史本秦官掌監郡然周官宗伯之屬已
有御史以中士下士爲之不過小臣之傳命者至戰國

而稍變其制不特秦有是官也史記藺相如傳秦趙之會各令御史書事則趙亦有御史國策安邑之御史死則魏亦有御史淳于髡曰御史在前掌記事綜察之任則齊亦有御史故張儀爲秦說韓說趙皆曰秦王使臣獻書大王御史可知列國各有是官蓋親近之職掌文書及記事者也張蒼初爲秦御史主柱下方書如淳曰主四方文書也則秦御史亦專掌文書及記事如周制老子柱下史之類原非任以彈劾也其後又使之監郡蓋以近臣使作耳目於外於是職司糾察而有彈劾之在漢初因之遂專爲風憲官而掌文書記事歸之太史判然分兩職矣按三王世家請立閹且等爲王疏則丞

相莊青翟居首而御史大夫張湯次之既奉制可則制書山御史大夫湯下丞相丞相下中二千石二千石下守相是猶沿秦制御史爲掌文書之官故先從御史方下丞相也王充論衡量知篇亦云御史之遇文書不失分銖以其習而熟也

祭酒

祭酒本非官名古時凡同輩之長皆曰祭酒蓋飲食聚會必推長者先祭胡廣曰古禮賓客得主人饌則老者一人舉酒以祭示有先也史記荀卿傳齊襄王時田駢之屬皆已死荀卿最爲老師齊尙修列大夫之敬而荀卿三爲祭酒漢書淮南王傳伍被諫曰吳王賜號爲劉

氏祭酒註云吳王濞于宗室最尊故曰劉氏祭酒也後漢書班超賤時有相者謂曰祭酒布衣諸生耳而當封侯萬里之外是布衣亦稱祭酒也班固奏記東平王蒼曰京兆祭酒晉馮好古樂道亦以布衣稱祭酒也卓茂爲門下掾祭酒蔡順爲郡東閣祭酒龍邱萇爲議曹祭酒是掾吏皆有祭酒也劉寬行縣輒引學士祭酒執經對講是學士亦有祭酒也張興爲侍中祭酒是近御亦有祭酒也蓋同官之長者則號祭酒故張魯以鬼道教衆令其弟子領部衆者亦皆號祭酒也後漢百官志博士祭酒一人本僕射也光武初改爲祭酒蘇竟傳竟以明易爲博士講書祭酒按博士十四人皆六百石博士

祭酒亦六百石可見其官同但以之爲長耳然後世國
子監之有祭酒實自此始蓋漢時博士之官卽大學師
儒也

監司官非刺史

范文正公爲人作墓誌以轉運使爲刺史尹師魯言其
誤卽改之今人以各巡道比古之刺史亦非也古刺史
正如前明巡按御史耳巡按御史以七品官彈劾督撫
以下蓋取其官輕而權重官輕則愛惜身家之念輕而
權重則整飭吏治之威重漢武設十三部刺史正是如
此其秩僅六百石而以六條察二千石其官皆屬御史
中丞薛宣傳宣爲中丞執法殿中外總部刺史是也

漢官儀亦

云御史中丞外督部
刺史內領侍御史

其制本起于秦史記秦泗川監平註云秦

時御史監郡若今刺史是秦已有此職漢惠帝因之文

帝改用丞相吏漢官舊儀丞相初置吏十五人皆六百

石爲東西曹東曹九人出督州爲刺史是也改置部刺

史乃武帝元封元年之制凡刺史稱傳車吏稱從事居

無常處吏不成臣

見魏書夏
侯元傳

此其大較也郡守不得面奏

事而刺史得面奏事京房傳云臣爲刺史又當奏事而

議者不悅乃以臣爲太守所以隔絕臣是也

按漢郡守亦得
奏事王溫舒爲

河內守私置馬五十匹馳奏是也但不得面奏事耳後漢書百官志刺
史每歲終詣京師奏事光武改制乃詔刺史因計吏奏事不必赴京

有旣爲

刺史之後仍遷郡守者蓋其秩本卑遷守非黜如黃霸

以揚州刺史爲潁川太守陳咸以部刺史歷東郡太守

是也是刺史本御史中丞所屬其秩甚卑而可以彈治大吏與前明巡按御史一一相似其稍有不同者漢刺史專察二千石長吏而丞尉以下則二千石所察刺史不與焉朱博傳博爲冀州刺史吏民遮道訴事博下令曰欲言縣丞尉者刺史不察黃綬各自詣郡欲言二千石墨綬長吏者刺史還治所受治之是漢刺史不察丞尉而明巡按則無所不察耳其沿革亦有可考者西漢至成帝時翟方進以爲春秋之義用貴治賤不以卑臨尊刺史位下大夫而臨二千石輕重不相準乃奏罷刺史改制州牧後朱博爲御史大夫仍奏復刺史王莽時又置州牧如劉聖公傳荊州牧發兵攻綠林兵反爲綠

林所敗是也更始因之亦置州牧如幽州牧苗曾爲光武所誅是也公孫述亦假益州牧以起事而光武初亦仍州牧之制如以朱浮爲幽州牧郭伋爲雍州牧是也至建武十八年乃罷州牧仍置刺史十二人而其制比西漢稍異舊制州牧奏二千石長吏不任職者事皆先下三公遣掾史案驗然後黜退光武不復委任三府而權歸刺史見朱又舊制諸刺史常以八月巡郡國錄囚徒考殿最歲盡詣京奏事光武改令但因計吏奏事此西東漢刺史不同之制也靈帝末四方兵起劉焉建議以爲刺史威輕宜改置牧伯選重臣以鎮之遂以焉爲益州牧黃琬爲豫州牧劉虞爲幽州牧州任之重自此始

見劉焉傳

獻帝時韓馥爲冀州牧袁紹爲渤海太守荀諲說馥

曰渤海雖郡實一州也今將軍處其上袁氏必不能爲

下馥遂以州牧讓紹又劉表爲荊州刺史統領八郡貢

至京師詔加表爲荊州牧公孫度據遼東自稱平州牧

分置太守以下官此又漢末改刺史爲州牧之制也故

三國志論曰漢季以來刺史總統諸郡賦政于外非但

如曩時司察而已魏晉因之刺史任重者爲使持節都

督有二刺史而都督十數州軍事者其次爲持節又次

爲假節其時郡各有太守丞尉而刺史統之隋開皇三

年罷郡以州統縣自是刺史之名存而職廢所謂刺史

者乃太守之互名耳唐武德中堂太守爲刺史名雖屢

更而其職卽郡守之職也其大將爲刺史者則加節度使之號連制數郡而其屬郡爲刺史者則曰支使故刺史之職益輕非復漢之舊矣

開元中置諸道採訪使得專停刺史

顧寧人云漢刺史猶明之巡按御史魏晉後刺史猶今之總督隋以後刺史猶今之知府知州而已

兵馬司

京師有兵馬司專理捕盜及鬪毆等事其制起于元世祖至元九年改千戶所爲大都路兵馬司堂京城捕盜事見世祖本紀又續通考云京南北有兩兵馬司各至千人每百戶所中產者一人充資發官有綱運及流徙者至則執兵導送外此則不敢役示專其捕盜職

文信國至京送兵馬司械繫空宅中十餘日凡囚兵

馬司者四年始就戮

吏部掣籤

吏部掣籤始於明萬歷中孫丕揚爲冢宰時大選外官
競爲請托丕揚創爲掣籤之法分籤爲四隅東北則北
京爲主而以山東及河南之汝彰歸南京之廬鳳淮揚
附之東南則南京浙江福建江西廣東爲主而以河南
之懷慶開封河南南陽湖廣之鄖陽附之西南則以湖
廣四川雲南貴州爲主而廣西之柳州南寧慶遠潯州
太平附之至於起復調簡地僻缺孤或人浮于缺則又
借附近之地以通籤掣之窮吏部之有籤自此始也見
明史選舉志及東林列傳亦見顧仲恭竹籤傳按于慎

行筆塵謂孫公患中人請托故創爲此法一時宮中相傳以爲至公下逮閭巷亦翕然稱頌而不知非體也古人見除吏條格却而不視奈何自處于一吏之職人才長短資格高下皆所不計乎顧寧人亦主其說然吏弊日滋自不得不爲此法所以二百年來卒不能改此亦時勢之不得不然也

奏本擡頭

凡奏事遇至尊必高其字于衆行之上蓋自古已然魏志景元元年詔尊崇燕王之禮

燕王字乃常道鄉公之父

凡奏事上書稱

燕王者皆上平可見古時凡稱君上高出本文之上今日上平蓋另行起而與本文相平以殺於天子之式耳

行香

外省文武官每朔望例向文武廟行香按行香之名起于六朝南史何尚之于宅設八關齋自行香南齊魚復侯子響誅後武帝心悔之百日于華林園作齋親自行香岑敬之于重雲殿法會梁武帝親自行香見之遂除博士此行香之見于六朝者唐宋以來則皆以國忌日

行香

程大昌演繁露謂國忌行香本起於後魏

通鑑記事唐太宗崩武才人出感恩

寺爲尼忌日高宗詣寺行香見之才人泣上亦泣唐撫言云于相琮有門下客郭薰應試琮爲之地主文趙隲無計拒之會列聖忌辰宰執已下俱於慈恩寺行香忽有綵帖千餘隨風飄至皆有新及第進士郭薰一事公

卿相顧靦然隲因是得黜薰遼史統和中詔景宗忌日
諸道遣官行香飯僧燕翼昭謀錄真宗大中祥符二年
九月詔宣祖昭武帝昭憲后忌日前一日不坐朝羣臣
進名奉慰寺觀行香禁屠廢務著于令王文正遺事云
舊制國忌迭命宰相參知政事一員率文武常參官赴
佛寺行香內職不與焉景德中陳堯叟王欽若爲樞密
使率內職同赴乃聽文昌雜錄云大忌百官集相國寺
俟宰相至百官班立于庭中揖訖然後行香後改景靈
觀行香道山清話云溫公在永興一日因國忌行香幕
客有事欲白誤觸燭臺汚公衣公不動亦不問容齋隨
筆云景德二年三月元德皇后忌辰中書樞密院文武

百官並赴相國寺行香據此數事則行香唐宋時皆以
國忌非必朔望也西溪叢語朱梁時大明節百官行香
祝壽則又有行之祝壽者然皆未定有朔望之制若朔
望朝拜則宋雖有之而不曰行香錢文僖留守西都應
天院有三聖像去府十里每朔望集衆官朝拜未曉而
往拜畢飲三杯而退文僖戲爲句曰正好睡時行十里
不交談處飲三杯是朔望朝拜亦是舊制而與行香爲
兩事王棠知新錄謂洪武十七年詔朔望日郡縣官以
下詣學行香則朔望朝拜及行香并爲一事乃洪武制

授官表讓

古人授官例有讓表劉玄謂本唐虞禹讓稷契皋陶之

遺意文心雕龍曰昔晉文受冊三辭從命是以漢末讓表以三爲斷曹操著令表不必三讓又勿得浮華所以魏初表章指事造實今按晉張華三讓公封表羊祜辭開府表庾亮讓中書監表任昉有爲齊明帝讓宣城郡公表爲范尚書讓吏部封侯表皆傳於世世說王述轉尚書令事行便拜其子文度曰故應讓述曰汝謂我不堪耶文度曰何爲不堪但克讓自是美事述曰旣云堪何爲復讓宋書王華傳宋世惟華與劉湛不爲飾讓得官卽拜以此爲常北史郭祚傳魏孝文以李彪爲散騎常侍旣而悔之謂祚曰朕昨誤授人一官祚曰豈容聖詔一行而有差異帝沉吟曰此白應有讓表因其讓朕

欲別授一官須臾彪有啓曰伯石辭卿子產所惡臣欲之已久不敢辭讓帝嘆謂祚曰卿之忠諫李彪正辭使朕不能自決遂不換李彪官又孝文愛馮誕除官日親爲作三讓表將拜又爲作謝表邢邵傳有一貴人初授官享客邵與袁翻俱在座翻意主人託已爲讓表主人乃命邵作之翻甚不悅可見昔人每授官必作讓表固是難進易退之意然沿習日久虛僞成風浸尋及於唐宋益襲爲故事在上者旣授之以官必不因其讓而收回成命在下者亦明知其辭不允特借一辭以鳴高觀唐宋諸人集中內外制詞多有批答不允及斷來章不允之詔上下相接以僞徒費筆墨甚可笑也 本朝之

制凡三品以上遷官者但有謝招無僞爲辭讓之事
以見 朝廷尊嚴風氣敦實迥軼前代萬萬矣

換官不換印

古時每授一官必鑄一印非如後世之官換而印不換
也漢書朱買臣爲會稽太守先衣故衣懷印綬步歸郡
與邸吏共食吏竊見其綬怪之視其印則會稽太守章
也吏驚出語掾吏遂白守丞共迎之是時買臣未蒞任
與舊守交代而先已懷印而來可知漢制每授一官卽
刻一印與之武帝以汲黯爲淮陽太守黯伏謝不受印
綬詔強與之又可見除官時卽予印綬而去非如後世
之到工始接印也又張安世傳安世薨天子贈印綬則

印綬且以之送葬矣魏志王淩被誅并燒其印綬誅其人而并燒其印益可知印不必授後官矣魏氏春秋許允善相印將拜鎮北將軍以印不善使更刻之如此者三晉王瑩拜丹陽尹鑄印六鑄六毀及成頭缺補而用之居職六日而卒益可見易一官必刻一印矣其尤明白可據者南史孔琳之議曰官莫大于帝王爵莫尊于公侯而傳國之寶歷代遞用襲封之印奕世相承貴在承舊無取改作今世惟尉一職獨用一印至于羣官每王悉改討尋其義實所未喻若謂官各異姓與傳襲不同則未若異代之爲殊也苦或因有誅夷之臣避其凶穢則漢用秦寶未聞因子嬰被戮而棄不用也而終歲

刻鑄喪工消實金銀銅炭之費不可勝言請衆官卽用
一印無煩改作若新置官及官多印少然後鑄益可見
古人官印之制後世換官不換印其卽本於琳之之議
歟

假守

秦漢時官吏攝事者皆曰假蓋言借也史記秦王政十
六年發卒受地于韓南陽假守騰又項羽殺宋義諸將
因共立羽爲假上將軍陳涉以吳叔爲假王監諸將擊
秦景駒自立爲楚假王尉佗以法誅秦吏以其黨爲假
守韓信破齊請爲假王鎮之西域傳遣騎假司馬爲斥
堠屬校尉王莽攝位稱假皇帝後漢書竇固以班超爲

假司馬凡此皆言攝也非真假之假也其官吏試職者則曰守尹翁歸爲東海太守入守右扶風滿歲爲真張敞以冀州刺史守太原太守滿歲爲真王尊以光祿大夫守京兆尹後爲真薛宣由陳留太守入守左馮翊滿歲稱職爲真朱博由琅琊太守入守左馮翊滿歲爲真張升爲郡綱紀以能守外黃令論殺臧吏或譏升守領一時何足趣明威戮乎卓茂初爲密令郡太守以其不能乃爲置守令所謂守令者亦卽攝事之令也凡試職皆曰守如今初任官有試俸之例也衛宏漢官舊儀丞相史物故調御史少史守若御史少史以事他出調御史少史屬守此亦攝事稱守之證舊唐書百官志文武

自一品至九品各有散官

如文則光祿大夫以至將仕郎武則鎮軍將軍至校尉副尉

謂之本

品職事則隨才錄用或從閑入劇或去高就卑貞觀令以職事高者爲守職事卑者爲行仍各帶本位其欠一階者爲兼永徽以來欠一階者或爲兼或爲守參而用之其兩職事者亦爲兼咸亨二年始一切爲守

文昌雜錄潞國文公守太尉皇弟雍王曹王守司空鄭國富公濟陽曹郡王守司徒三公官備近世未有也

晉書魏延未封以來父一
 聞言來河東悲泣而歸
 以爲憂事高善爲也
 燕軍昔與會以各帶本
 於其久一
 爲嘉車頃刻太勢既在
 分關人博斯之知無早
 自時合
 自一品至武品者皆封有
 功先臣子乃大士也
 諸公之小

陔餘叢考卷二十七

陽湖 趙翼 雲崧

按月分俸

南史阮長之傳宋以前郡邑官田祿以芒種爲斷芒種前去官者則一年祿悉歸後人至元嘉末始改此科計月分祿是按月分俸自宋元嘉末始也然封氏聞見記准例替人五月五日以前到者得職田米高利自濠州改楚州欲以米讓前人乃到處淹泊候過數日始到士論稱之則唐制又不按月也或此職田米又是俸外所得另有一例耳

京官月費

京官俸銀之外別有月費一種起於前明明初諸司見
隸主騶從宣德間始有納銀免役者因楊士奇言京官
祿薄改名曰柴薪銀天順以來始以官品崇卑定立名
數每歲銀解戶部在京諸司則皆出自畿內及山東山
西河南州縣南京諸司則皆出自南畿此月費所由來
也見傳維麟明書楊士奇傳按宣德時顧佐爲都御史有奸吏誣奏佐受
隸金私遣歸上密以語楊士奇士奇曰中朝官俸薄僕
馬薪芻皆資之隸遣隸歸隸得歸耕官得資費朝官皆
然蓋自永樂中至今先帝固已知之以故增朝官俸顧佐傳

預借俸錢

選人出京必借京債其利最重到任卽須子母償還最

爲國弊令甲凡請選官得缺後預借養廉以免丐貸所以恤下養廉法至善也按舊居書武宗紀會昌二年二月中書奏選官多京債到任填還致其貪求周不由此今請令得官者許連狀相保戶部各備而月加給料錢至支時折下所冀初到官任不帶息債衣食稍足可責清廉從之又宋元祐中孫覺奏云臣備員吏部見每一闕出爭者至一二十人雖烟瘴地亦不辭嘗訪其故以授遠闕例得先借料錢遠者三月得四十餘千故也則此制唐宋亦有之

致仕官給俸

致仕官給俸之例起於漢乎帝詔天下吏二千石以上

年老致仕者三分其祿以一與之終身蓋其時王莽專政欲以收衆心故有此舉也

引王記曰臣致仕于君者養之以其祿之半是漢時本有此說而莽竊之以邀譽耳

然漢書石奮以上大夫祿歸

老于家周仁以二千石祿歸老張歐請免天子亦寵以

上大夫祿歸老則優老之典本不自莽始特未著令以

前致仕給祿須出特恩既著令以後則凡二千石以上

致仕者皆可得耳歷代致仕給俸之例有著爲定令者

有不著爲定令者後漢書鄧彪請老章帝賜錢三十萬

以二千石祿終其身第五倫請老以二千石俸終其身

劉昆乞骸骨詔賜洛陽第舍以千石祿終其身則王莽

之制至東漢已廢其給俸者仍出特賜也唐書虞世南

致仕詔祿賜同於職事許敬宗致仕仍朝朔望續其祿唐休璟請老給一品全祿張仁愿致仕亦給全祿米璟請老以全祿退居東都王邱旣老藥餌不給詔給全祿以旌潔吏解琬告老詔以金紫光祿大夫致仕準品給全祿楊於陵致仕詔俸料全給元時許有王致仕給俸終其身閻復乞歸給半俸終其身此不著爲令而出特恩者也後魏書孝明帝令年滿七十致仕者給半祿隋書大業五年詔品官七十以上不堪居職者量給廩祿以終其身遼史本紀穆宗詔左右從班老耄者增俸以休于其家宋初致仕官給俸亦出特恩如王彥超致仕太祖詔給大將軍俸上官正致仕賜全俸仍給以見

錢至太宗淳化元年始詔凡致仕官皆給半俸

獨醒志謂宋自章聖

後始命致仕者給半俸則太宗時猶未著爲令與宋史互

真宗大中祥符五年詔賜致仕官

全祿仁宗景祐二年詔自今兩省大卿監正刺史閣門使以上致仕給俸如分司金史熙宗詔文武官五品以上致仕者給半俸世宗又詔職官年七十以上致仕者給半俸此著爲定令凡致仕者皆得之不必隨時請旨者也宋又有宮觀使爲致仕者食祿之地神宗紀制宮觀官以處卿監監司知州之老者其議本起于王安石青苗法行諸老臣多致仕去故設此以慰之然王旦致仕以太尉領玉清昭應宮使初旦以宰相兼使今罷相猶領之其專領使自旦始則致仕兼宮觀使神宗以前

已有之又不自安石始蓋神宗以前僅爲宰相優老之地至神宗時乃多立各路宮觀名目使卿監以下皆得藉此食俸耳又宋史謝泌傳云近制文武官告老皆遷秩給半俸泌請自今七十以上求退者許致仕因疾及犯贓者聽從便詔從之然則宋時雖以疾去及犯贓去者皆得邀遷秩給半俸矣此又立法之太濫也明初無加恩致仕官之例明史楊鼎傳成化十五年鼎致仕賜敕馳驛歸命有司月給米二石歲給役四人大臣致仕有給賜自此始自後多有月廩歲夫之制然宣德中顧佐致仕資鈔五十貫命戶部復其家則已有加恩者又成化七年御史奏致仕尙書魏驥年已九十八歲乞衍

通權德輿罷相爲檢校吏部尚書與元節度使表納檢校吏部尚書請回贈其祖倕詔不許納官而贈倕爲尚書禮部郎中此後世馳贈之始也白樂天集亦有戶部尚書楊於陵贈其祖爲吏部郎中祖母崔爲郡夫人制詞然德輿身爲檢校吏部尚書而贈其祖不過禮部郎中於陵爲戶部尚書而贈其祖不過禮部郎中則亦不能以子孫之官全贈其祖也宋史李虛已當南郊恩封請罷妻封以授祖母寇城少孤鞠于祖母王氏及登朝乞以妻封回授趙旼逢郊恩當任子進階乞回其恩封母郡太君詔皆許之後遂爲例此則宋時可以已官全贈其先較唐制又稍優矣元許有壬言今制封贈祖父

母降於父母一等則元時封贈先世亦尙有差別一本朝令甲一二品封三代三品以下封二代六品以下封一代皆全用其本身官秩并許以本身封典回贈其祖則例封一代者實亦得封二代

聖朝錫類之仁超出前世萬萬矣又前代回贈之例有推及本生祖父者舊唐書崔植有陳情表云亡父嬰甫是臣本生亡伯祐甫是臣承後嗣襲雖移孝心則在請以在身官秩特乞回贈本生詔贈嬰甫吏部侍郎容齋隨筆云宋李昉幼出繼于叔昉入相表求贈所生父母官誥詔贈其本生祖溫太子太傅祖母權氏莒國太夫人本生父超太子太師母謝氏鄭國大夫人有明大臣

中移封本生大父母者有大學士楊士奇少保朱衡太
宰張翰其庶僚移封本生父母者京官起于嘉靖中修
撰諸大綬外臣起于萬歷中長垣令劉學曾異途起于
嘉靖中都事歐陽念鳴贊喬可躋俱見湧幢小品至本
生祖父之外別有移封者唐李德裕爲荆南節度使遇
當追贈奏乞回贈其兄故楚州刺史德修詔贈禮部尙
書劉總奏請追贈其外祖溪州刺史張懿乃贈懿工部
尙書其妻李氏趙國夫人宋王曾爲參知政事以幼孤
育於叔父母奏請改葬乃詔贈其叔宗元工部員外郎
母麗氏懷仁縣太君歐陽修少孤其叔教之學旣貴乞
以一官回贈詔贈郎中是又恩例之出于祖父外者也

近大司寇胡公雲坡幼鞠于其嫂乞以本身誥封同
贈蒙俞允曠蕩之恩無微不逮更有非臣卜意計
所及者矣

父在封母不稱太

王五代會要母妻敘封事例乾祐元年中書帖吏部
廢司父在母進封合加太字事例申上廢置司以前
後格敕內凡母皆加太字在歿並同卽不說父在不加
太字惟晉天福五年中書舍人艾穎八年尙書司門郎
中尹偁皆父在母封縣君不加太字云云蓋由子封母
固宜加太而父在母不稱太亦情理之當然也

貼黃

今刑部本及督撫題刑名本例有貼黃以篇幅繁多節其略別爲一幅貼於本後所以便觀覽也王敬哉冬夜箋記謂明崇禎中輔臣李國楷奏仿古人撮黃之法以定此式遂沿至今

顧亭人亦謂崇禎元年三月令上疏撮疏中大要不過百字附疏尾

按唐本有貼

黃之制乃詔敕所用集石林云唐降敕皆黃紙有所更改亦以黃紙貼之謂之貼黃宋奏劄皆白紙而意有未盡另以黃紙貼于後亦謂之貼黃是宋之貼黃已與唐之貼黃異然宋制貼黃乃奏劄所不能盡者另開條件書以黃紙附于正文之後如司馬溫公蘇東坡諸集皆有之或一疏後至十數條今貼黃則但摘取奏中緊要語貽于後是宋貼黃主乎詳今貼黃主乎簡今之貼黃

又與宋之貼黃異日今奏疏用白紙貼黃亦用白紙按江隣幾雜志云審刑奏案貼黃上更加撮白王所亭謂不知撮白爲何語抑知今之貼黃正宋之撮白耳

仕宦避本籍

漢書嚴助會稽吳人既貴上問助居鄉時爲友壻富人所辱助曰願爲會稽太守乃拜助爲會稽守又朱買臣會稽郡吳人後出爲會稽守韓安國梁成安人爲梁內史後漢書景丹櫟陽人光武以其功封爲櫟陽侯謂富貴不歸故鄉如衣繡夜行故以封卿是漢時尙無迴避之例杜佑通典謂漢時丞尉及諸曹掾多以本郡人爲之三輔則兼用他郡人而必特奏可見漢時掾屬官更

無不用本郡者蔡邕傳朝議以州縣相黨人情比周乃
制婚姻之家及兩州人士不得互相監臨於是又有三
互法禁忌轉密邕乃上疏極言其弊然則迴避本籍以
及親族相迴避之例蓋起于後漢之季也然魏晉以來
亦有不拘此者魏書張旣馮翊人魏武使爲雍州刺史
謂之曰還君本州可謂衣繡晝遊矣朱靈清河人魏文
帝封爲鄆侯欲以書繡榮之南史邱靈鞠烏程人爲烏
程令柳元景隨孝武入討孝武曰事成何所欲元景曰
願還鄉里及孝武卽位乃以爲雍州刺史以元景家襄
陽也張岱吳郡人爲吳郡太守齊高帝詔以家爲府後
從子緒亦爲吳郡太守柳慶遠襄陽人梁武以爲雍州

刺史詔曰卿衣錦還鄉吾無西顧憂矣張敬兒南陽人
以功乞爲本郡乃除爲南陽太守呂僧珍東海人梁武
欲榮以本州乃拜南充州刺史又以劉之遴爲南郡守
詔曰卿母年高故令卿衣錦還鄉盡榮養之道侯安都
母樂居鄉里陳武帝乃以安都弟曉爲東衡州刺史安
都子秘爲始興內史並在家侍養孫瑒吳人陳武帝謂
曰昔朱買臣願爲本郡卿豈有意乎乃授吳郡太守陳
武帝本吳興人在梁朝時其子昌爲吳興太守帝以鄉
里父老尊卑有數特令蔡景歷爲佐吏輔之魏書毛鴻
賓北地人孝明帝改北地爲北雍州以鴻賓爲刺史曰
畫錦榮卿也游明根告老其子肇求解官歸侍孝文帝

欲令祿養乃出爲本州魏郡太守甄琛中山人後爲定
州刺史北齊書封隆之四爲冀州刺史其本州也素得
鄉里人情其子繪復爲本州後周書李穆一家叔姪三
人皆牧宰鄉里蘇亮武功人爲岐州刺史朝廷以其作
牧本州特給鼓吹先還家並給騎士三千羽儀遊鄉黨
歡飲旬日然後入州令狐熙燉煌人爲燉煌太守晉公
護謂曰公一門之內須得衣錦之榮故命之王傑金城
人爲河州刺史朝廷以其勲望故榮以本州劉雄臨洮
人周武以爲河州刺史先已爲本縣令至是復刺本州
鄉里榮之柳敏河東人爲河東郡守雖統御鄉里而處
物平允甚得時譽蘇椿爲武功郡守旣是本郡惟清儉

自居馮遷爲陝州刺史遷本寒微一旦爲本州惟謙謹
接待鄉邑隋書田式祖安興父長樂及式三世爲本郡
太守此隋時不避本籍也唐書姜暮上邽人高祖命爲
秦州刺史謂故鄉錦衣用答元勲邱和爲交趾太守聞
高祖登極來朝帝以和本穰州人乃命爲穰州刺史以
自養張士貴洛州人高祖命爲洛州刺史曰令卿衣錦
晝游薛登常州義興人武后授爲常州刺史張九齡韶
州人以親老求歸養元宗乃以其弟九臯九章爲嶺南
刺史賀知章歸老詔以其子僧子爲會稽郡司馬使侍
養封氏聞見記侍郎唐皎掌選問選人穩便對曰家在蜀乃註吳有言親在江南
卽註隴右有一信都人心希河朔紹曰願得淮淝卽註潭潞間一尉是朝廷特
命者或不拘本籍而選宋史周祖以王晏家彭城乃授爲武寧
法原有迴避本籍之例

軍節度使俾榮其鄉里王仁鎬邢州人周世宗授爲安
國軍節度使制曰眷維襄國實卿故鄉分子龍節之權
成爾錦衣之美宋朝授官本籍之例大概有三一以便
就養一以優老臣一以寵勲臣太祖本紀乾德五年縣
尉鄆陵許永年七十五自言父年九十九兩兄皆八十
餘乞一官以便養乃授永鄆陵令彭乘益州人求便養
得知普州蜀人得守鄉郡自乘始陳希亮眉州人初蜀
人官蜀不得通判州事希亮以母老願折資爲縣乃令
知臨津縣朱昂家江陵致仕時詔以其子正辭知公安
縣以便侍養許歸江陵張詠濮州人初仕時乞掌濮州
市稅以便養許之蔡襄仙遊人以母老知福州後又知

泉州楊繪綿竹人以母老請知眉州劉湜彭城人知廣

州以母老求內徙遂知徐州湜喜曰昔布衣隨計今以

侍從官三品典鄉郡過始望矣洪皓白金歸以母董氏

年八十餘乞補外乃以徽猷閣學士出守饒州鄉郡

見獨醒志

文文山吉安人初除湘南提刑辭免乞便郡養親乃差

知贛州

見文山紀年錄

此皆以親老而不避本籍也

按真宗紀詔親老無兼侍者特與近任仁

宗紀選人父母年八十以上者權注近官是宋時本著為令邢昺以老乞給假歸曹州上曰便

可權與本州何須假耶遂拜工部尚書知曹州呂大防

藍田人罷相改永興軍使便其鄉社任中師年老上書

言家本曹州願得守曹遂以之知曹州范純夫引疾乞

歸章十上乃得請以待制知梓州

見晁氏志

韓子華兄弟為

潁州貴族罷相後仍帥鄉郡或賀以啓曰夙推荀氏之

龍仍致潁川之鳳

見王公四六話

湯思退知樞密院事垂相而病

除大資政留守金陵卽其鄉也未第時兄弟皆就食府

庠人以爲榮

見周益公玉堂雜記

此皆以優禮老臣使不避本籍也

韓魏公安陽人後出鎮大名卽其鄉郡歐陽公爲作畫

錦堂記公歿後其子忠彥以墳墓缺照管乞以其弟粹

彥監相州酒稅神宗御批曰韓琦有功于國特依所乞

今後常註其現仕子孫一人隨本資任當相州一差遣

見韓魏公君臣相遇傳

後琦之孫治守相州治之子肖胄乞侍其父

疾詔卽除肖胄守相州代其父任徽宗謂曰先帝詔韓

氏世官於相今父子相伏榮事也琦守相作畫錦堂治

作榮歸堂尙胄又作榮事堂三世守鄉郡人以爲榮此
又特寵勲臣而使世官鄉邑不避本籍者也其他亦有
不盡關優老便養而使官於鄉者王祐大名八大祖使
領大名謂曰此卿故鄉所謂畫錦者也范仲淹蘇州人
亦嘗知蘇州汪彥章徽州人後仍知徽州其謝表有曰
城郭重來疑千載去家之鶴交游半在或一時同隊之
魚至南宋之末以軍事重更多有使守鄉郡者李芾家
衡州攝湘潭縣知永州又知潭州崔與之廣州人後以
廣東安撫使知廣州卽家治事陳炤常州人初爲丹徒
縣尉後攝常州通判守城死此又以軍興需人不避本
籍也

按高宗紀紹興二年詔監司避本貫則宋制迴避本籍惟在監司
故應孟明婺州人除浙東提點刑獄以鄉郡引嫌乃改授江東

金史

李晏澤州高平人年老致仕乃詔其子昭略爲澤州刺史張大節代州人徙知太原府以并代鄉郡故榮之元世祖時許衡歸老河內特命其子師可爲懷孟總管以便養吳當撫州人爲江西肅政廉訪使左遷撫州總管趙雍湖州人松雪之子爲昌國海寧守則金元時亦間有不避本籍者迴避之例至明始嚴然太祖初設浙東提刑卽以龍泉人章溢爲僉事又命其子存道守處州而處州人胡深亦爲浙東行中書省左右司郎中總制處州軍民事又洪武四年正月河南府知府徐麟以母老家在蘄州請終養詔卽改爲蘄州知府是太祖時固不拘鄉貫也漱石齋閒談記永樂中命御史邵珪巡按

迴避之例自嚴也楊於陵爲戶部侍郎其子嗣復遷選
部員外郎以父子同省乞換他官詔同司親大功以上
非聯判勾檢官長皆爲避官同職異雖父子兄弟無嫌
時各部同一尚書省故云同省此又于應迴避之中稍示區別職事不相統
攝者不必避也韋抗爲御史兼按察京畿弟拯方爲萬
年令兄弟領本部時以爲榮此雖職相統攝然或以按
察係暫時差遣非久任者故爾元史大德七年以行省
官久任多與所隸編氓聯姻害政詔互遷之然大德八
年又詔父子兄弟有才者許並居風憲則元時親族迴
避尙疎濶矣

起復

俗以滿服後補官爲起復此甚非也龜雪錄云起復者
喪制未終而奪情起視事如歐公所作晏元獻神道碑
遷著作佐郎丁父憂去官已而真宗思之卽其家起復
爲淮南發運使及史嵩之遭父喪經營起復是也又宋
制并繫之官銜如起復左僕射中書門下平章事臣趙
普是也今以服闋爲起復誤矣又趙昇朝野類要云已
解官持服而朝廷特擢用者名起復卽奪情也王阮亭
亦引此以證俗說之謬今按南史蕭坦之居母喪起復
爲領軍將軍舊唐書蘇環卒詔其子頌起復爲工部侍
郎頌抗表固辭詔許終制張九齡喪母詔奪哀起復同
中書門下平章事九齡固辭不許通鑑唐順宗時王叔

兩浙辭以本籍不當往上曰以卿浙人知浙中利害耳浙人授浙官卽須辭免則迴避本籍已爲成例可知以後亦間有不迴避者葉春海鹽人宣德正統間凡三爲浙江巡撫治事於鄉王彰彰德人亦巡撫河南彰傳謂終明之世大臣得撫鄉土者彰與春而已然此外亦尙有王瑜淮安人後鎮淮安總督漕運魏源江西建昌人宣德中永新民亂帝命源往撫之又景泰中命吳人楊翥之子爲本邑主簿是亦不止春與彰二人而已也本朝督撫大吏亦往往有此蓋常調官例須迴避所以杜瞻徇之弊至於親信大臣原可不拘成例是固立賢無方之意也其常調官仍有親老改補近省之例旣

不得於臨下又可便於養親可謂通乎人情斟酌至當矣

親族迴避

親族迴避起於後漢已見蔡邕傳按晉陽秋劉宏爲荊州都督諸軍事詔以宏壻夏侯陟爲襄陽太守乃荆屬郡也宏表陟姻親舊制不得相監臨乃罷之可見晉時此例已嚴宋書劉祗爲中書郎江夏王義恭領中書監服親不得和臨表求解職孝武詔曰昔二王兩謝俱至崇禮自今三臺五省並同此唐書賈敦頤爲瀛州刺史弟敦實爲饒陽令舊制大功之嫌不連官朝廷以其治行相高故不徒以示寵此以其治行特破成例則親族

文用事旣而有母喪韋執誼多不用其語叔文乃日夜謀起復憲宗時昭義節度使盧從史遭父喪朝廷無起復之命乃賂宦官吐突承璀請發本軍討王承宗以冀起復昭宗時韋貽範爲相多受人賂許以官遭母喪去位日爲債家所譟乃日夜謀起復此皆在喪起復者也五代史鄭餘慶嘗採唐士庶吉凶禮爲書儀兩卷明宗見其有起復之制嘆曰儒者所以隆孝悌無金革之事而起復可乎宋史夏竦丁母憂潛至京師依中人張懷德爲助王欽若方善竦遂起復知制誥以左司郎中爲翰林學士楊億丁母憂未卒哭起復爲工部侍郎元史監察御史陳思謙言內外官非文武全才及有金革之

事者不許奪情起復是元時亦尙不以服闋爲起復也
按宋史向子諲坐言者降三官起復知潭州則凡降
官而復職者亦皆謂之起復又不專指停喪授職者
未葬親不許入仕

古時又有親未葬不得入仕之例晉書載記常煒言魏
晉之制祖父未葬者不聽服官按鄭默華廙二傳其時
雖不行三年喪然未有不葬而仕者南史兖州刺史滕
恬烏程令顧昌皆以不葬親而入仕爲清議所鄙唐書
顏真卿劾奏朔方令鄭延祚母死不葬三十年有詔終
身不齒是唐時雖未有定例而犯者必黜其官周廣順
中詔親孝葬者不許入仕宋史吳充奏士大夫親喪或

藁殯數十年宜限期使葬著爲令又劉綜奏京朝官當
任遠官者率以父母未葬爲辭意求規免請自今父母
未葬者許請告營辦審官投狀明言父母已葬方許依
例考課違者並罷其官從之是周宋時嘗著爲令甲按
劉昫傳昫與弟煥皆侍從而親喪未葬坐奪職王子韶
傳御史張商英劾子韶不葬父母而冒轉運使判官之
任乃貶知高郵縣又道山清話孫莘老入相不及一年
而罷坐父死不葬故也後莘老作家廟記自辨劉器之
爲其集序可見宋時此禁甚嚴

一產三男有賞

令甲一產三男者督撫具本達部照例給賞此本古制

也國語越王句踐時民間生三男者公與之母註乳母也生二人者與之餼是此制本起於句踐漢章帝賜諸懷妊者胎養穀人三石復其夫勿算則并於懷胎時亦給以養贍矣

見宋史
韓綱傳

晉載紀石勒時黎陽人陳武妻一產

三男一女勅賜以乳婢一口穀一百石雜祿四十匹堂
陽人陳緒妻產三男賜衣帛廩食乳婢一口復三歲勿
事此史記邵傳舊格生兩男者賞羊五口不然則絹十
匹僕射是遲奏革之邵云此格不宜輒斷可見漢魏以
來已爲定制至如各史本紀遇此事必書則始于五代
史如後唐同光二年左熊威將趙暉妻一產三男子天
咸元年石縣民高存妻一產三男子漢乾祐元年內

黃民武進妻一產三男子是也歐陽公謂此因變異而
書者金章宗紀禮官言一產三男內有才行可用者量
材敘用其奴婢所生舊制官給錢百貫以資乳哺尙書
請更給四十貫贖以爲良制可

旌門法式

五代史李自倫傳戶部奏前登州義門王仲昭六世同
居其聽事步欄前列屏樹烏頭正閼闕一丈二尺烏頭
二柱端冒以瓦桷築雙闕一丈在烏頭之南三丈七尺
夾樹槐柳十有五步今李自倫旌表請如之敕曰此故
事也今式無之其量地之宜高其外門門安綽楔左右
建臺高一丈二尺廣狹方正稱焉圻以白而亦其四角

使不孝不悌者可以悛心而易行焉然則旌門之式舊最繁重至五代始改從簡易第安綽楔于門而已宋史孝義傳旌郭義家于其所居前安綽楔左右建土臺高一丈二尺下廣上狹飾以白間以赤蓋亦沿五代之制皆官爲建造也今制應旌表者官給銀三十兩聽其家自建其坊制或設於門或別建他所或四柱或二柱其上亦有用烏頭者蓋合唐宋五代之制而參用之

國忌日不決囚

國忌日不決囚唐以來已有此制按舊唐書太和五年御史奏均王傳王堪男國忌日於私第科決罰人特降詔國忌日惟禁飲酒舉樂至于科罰人吏本無明文但

緣其日不合釐務官曹即不得決斷刑獄其小小答責
固無所妨今後有此類臺府更不要舉奏此事亦見容
齋隨筆是唐時國忌日百官以休務故不決斷刑獄已
沿爲故事矣元微之詩云縛遣推囚名御史狼籍囚徒
滿田地明日不推緣國忌又唐書裴寬傳禮部言忌日
享廟請用樂寬奏廟尊忌卑則作樂廟卑忌尊則備而
不奏遂定爲制後世忌日不舉樂蓋本此

孕婦緩刑

北史崔浩定律令婦人當刑而有孕者許產後百日乃
決後世孕婦緩刑始此魏書北海王元愉以謀逆誅將
并誅其孕妾李氏崔光奏曰李今懷妊例待分產乞停

李獄以俟孕育帝從之此浩定律後事也然漢刑法志

景帝詔孕而未乳當鞠繫者皆頌繫之

頌容也容之不極
枯也亦見刑法志

王莽傳莽子宇以血灑莽門發覺飲藥死宇妻懷子繫
獄須產子乃殺干寶晉書母邱儉起兵被誅其孫女適
劉氏以孕繫廷尉則孕婦遲刑本漢魏之制豈元魏時
此律已廢至浩而又著爲令歟

聽重囚妻孥入獄

令甲長繫之囚許妻孥入視其無子者并許其妻入宿
命後漢書吳祐傳安邱男子母邱長有醉客辱其母長
殺之旣就獄祐謂曰赦汝非義刑汝不忍汝有妻子乎
對曰有妻無子祐乃令其妻同宿獄中妻遂懷孕長臨

刑告母曰妻若生子當名之曰吳生也晉書曹摅傳有
張兌爲父報讐有妻無子縣令喬智明愍之令兌妻入
獄後遇赦得免北史後周時裴政爲司憲用法寬平囚
徒犯極刑者許其妻子入獄就之至冬將行決皆曰裴
大夫致死於我死無所恨此皆聽重囚妻孥入獄之故
事也特其時尚未有定制故長吏法外行仁後世著爲
成例其卽昉此歟

笞髻

漢刑法志文帝除肉刑以笞代劓剕後以笞數多反多
死景帝乃遞減笞數又詔定箠令笞者箠長五尺用竹
其本大一寸末薄半寸皆平其節當笞者笞髻母得更

人卑一罪乃吏人自是笞者得全邱濟謂笞所用之材所制之度所行之人所施之處皆定於此唐書宇文審以夏楚無小大之制始創杖架以高庫度杖長短此又後世頭號二號之始也知新錄夾棍起於宋理宗時以木索並用夾兩股名曰夾幫又豎堅木交辯兩股令獄卒跳躍於上謂之超棍梭見於莊子罪人交臂歷指註謂卽今背剪梭指也梭音贊入聲韓昌黎詩崩勝相排梭今俗讀作斬音

滴血

驗屍有滴血之法其來已久按南史孫法宗以父被孫恩戕於海滙乃沿海尋求聞世間論是至親以血滙骨

常悉凝浸乃操刀見枯骸則刻肉灌血如此十餘年髀脛無完皮梁豫章王綜母吳淑媛本齊東昏妃武帝納之七月生綜綜自疑爲東昏子聞俗云以生者血滴死者骨滲入卽爲父子乃私發東昏墓出其屍瀝血試之既有徵矣又自殺其次男瀝血試之然則滴血之法其起于六朝歟唐書王少元求父尸於野不可識或告曰以子血漬而滲者父尸也少元果得父尸

稅契

市易田宅旣立文券必投驗官府輸納稅錢給以印憑謂之稅契此起于東晉時按隋志晉自過江凡貨賣奴婢牛馬田宅有文券者率錢一萬輸作四百入官賣者

三百買者一百無文券者隨物所堪亦百分收四名爲
散估歷代遂因之不廢然其制賣者出錢多買者出錢
少殊非平允其後定制但令買者出錢不知始於何時
按洪景廬以民間投稅皆買者獨輸故爲數多者率隱
減價直賒立歲月因此轉滋告訐乞蠲其半使民皆樂
輸下戶部議格然則買者出錢南宋時已如此也

戒石銘

郡縣廳事之南有亭書爾俸爾祿民膏民脂下民易虐
上天難欺十六字謂之戒石銘留青日札謂是黃庭堅
所書續通鑑綱目亦載宋紹興二年以黃庭堅所書戒
石銘頒于州縣刻石然其實非起于紹興乃宋太宗書

有四句云天有昭鑒國有明法爾畏爾謹以中刑罰此

不知起於何人

魏牖開評記有人于戒石銘每句下各添一句云爾俸爾祿只是不足民膏民脂轉吃轉肥下民易虐來的便著上天難

欺他又怎知

清慎勤匾

各衙署訟堂多書清慎勤三字作匾額此本之世說註李秉家誠曰昔嘗侍坐於先帝時有三長史俱見臨辭出上曰爲官長當清當慎當勤修此三者何患不治乎並受詔上曰必不得已而去於斯三者何先或對曰清爲本上顧吾吾對曰清慎之道相須而成必不得已慎乃爲大上曰卿言得之矣此情慎勤三字所本也

亦見三國志李

通傳

註

鄉都圖

今江南各縣中分民居爲某鄉某都某圖謝少連作歙縣志謂圖音鄙乃都鄙之遺制也趙宦光亦曰都鄙本作圖俗誤讀作圖顧寧人非之而引嘉定縣志曰圖即里也以每里冊首一圖故不曰里而曰圖又引蕭山志謂改里爲圖自元始然寧人亦失於考按宋史袁燮傳燮爲江陰尉常平使屬當賑災燮命每保畫一圖田疇山水道路悉載之台保爲都台都爲鄉合鄉爲縣征發爭訟追胥拔圖可立決以此爲荒政首則鄉都圖之制起於南宋也

江南等省又有魚鱗冊明洪武二十年命國子生武淳等八行州縣隨相定區量度田畝方員次以字號編類爲冊狀如魚鱗

相次號曰

魚鱗圖冊

省

今制分天下爲各省蓋仍前明之制而明則因元之舊也元時諸路各設行中書省是以有省之名前明改行省爲布政使司而口語相沿不改故猶稱省耳原省之名之所起則本於漢按漢書昭帝紀帝年幼帝妨鄴邑公主共養省中註伏儼曰蔡邕云本爲禁中門閭有禁也後以孝元皇后父名禁故避之曰省中也衛宏漢官舊儀註亦曰省中禁中也成帝外家王禁貴重朝中諱禁故曰省然則本由禁中改曰省中後世以中書尙書諸官署設在省中遂移爲官署之名曰中書省尙書省唐書楊收傳漢制總制羣官曰省分務而治曰寺是也

至元設行中書省於各路遂又移爲方州之名曰各直省也然行省之稱亦不自元始陸放翁詩往者行省臨秦中我亦急服叨從戎又云行省當年駐隴頭腐儒隨牒欲西遊是南宋已有行省之稱然惟四川安撫大使則稱之他尙無此名金宣宗時州縣爲元兵殘破乃隨處設行省以治一方如興定三年有東平行省蒙古綱河北行省侯摯又苗道潤傳詔山東行省諭李琛與道潤和解又靖安民願隸潞州詔河北行省審處之是金末亦已有行省矣

履歷

按魏書源子恭傳時有亡人許周僞稱梁黃門侍郎子

之頌於天下也

宋史本紀太平興國八年夏四月班外官戒諭辭蓋卽此

而太宗則又本蜀孟

昶之文而節之景煥野人閒話載孟昶全文朕念赤子
盱食宵衣言之令長撫養惠綏政存三異道在七絲驅
雞爲理留犢爲規寬猛得所風俗所移無令侵削無使
瘡痍下民易虐上天難欺賦與是切軍國是資朕之賞
罰固不踰時爾俸爾祿民膏民脂爲民父母莫不仁慈
勉爲爾戒體朕深思共二十四句洪容齋謂昶詞雖多
轉不免掛一漏百經太宗刪節彌覺簡括不遺然則此
詔太宗時已頒行後山谷曾書之至紹興中復以山谷
所書頒行耳客中閑集亦記戒石本於孟昶而宋太宗
刪之而歐陽公集古錄謂戒石起於唐明皇特不見其

詞耳則又在孟利之前矣然歐陽謂明皇之詞已不可見亦疎于考據明皇有賜諸州刺史題座右詩云谷言思共理鑑夢想維良猗歟此推擇聲績著周行賢能既俟進黎獻實佇康視人當如子愛人亦如傷講學試誦論阡陌勸耕桑虛譽不可飾清知不可忘求名跡易見安貞德自彰訟獄必以情教民貴有常恤憫且存撫老弱復綏強勉哉各祇命知予眷萬方此卽其戒石詞也按商書制官刑儆於有位則戒誓之辭其來最古文心雕龍云漢揚雄有卿尹州牧箴二十五篇崔駰胡廣又補綴爲百官箴北史何妥爲龍州刺史箴勒於州門外齊竟此又戒石之所昉也七修類稿又記浙中各官廳別

恭疑之表云據其履歷清華則家累應不輕今來歸化
何其孤迥履歷二字始見此宋史王彥超傳太祖欲罷
諸宿將兵柄從容置酒召武行德等宴謂卿等久臨劇
鎮非所以優賢之意彥超喻旨卽請老行德等尙自陳
夙昔戰功及履歷艱苦雷德驤傳太宗謂宰相曰朕欲
擇轉運使所患不知其人履行可令德驤錄京朝官履
歷功過之狀以便引對畢士安傳或薦張洎文學太宗
曰洎視士安詞藝踐歷固不減但履行遠在下耳盧知
原傳爲吏部尙書以官秩次第履歷總爲一書功過殿
最開卷瞭然石豫傳左膚爲御史履歷與豫略同是履
歷二字至宋時始爲官場成語

民壯

今州縣官衙前給使者有民壯餽于官而供役其名則起于前明天順初令召募民壯鞍馬器械悉從官給木戶有糧免五石仍免戶丁二名至宏治間又令州縣選取年二十以上五十以下每里僉二名或三名五名春夏秋每月操一次冬操二歇三遇警調集官給行糧後王陽明破泐頭等賊及平宸濠皆用其力此說見湧幢小品而明史兵志則云正統二年募軍餘民壯願自効者人給布二匹月糧四斗景泰初募直隸山東西民壯守大同紫荆等關宏治二年立僉民壯法州縣七八百里以上里僉五人五百里里四人三百里里三人百里

里二人有司訓練遇警調發給以行糧富民不願則上
直於官官爲僱募隆慶中又定一家有三丁者籍一州
與大縣可得千五六百人小縣可得千人隸撫臣操練
歲無過三月月無過二次練畢卽歸農復其身

官府乘轎

轎本起於南俗山行非舟車可通故有此器史記河渠
書引夏書曰禹山行卽橋橋卽轎也漢書淮南王安諫
武帝伐越書曰輿轎而踰嶺臣瓚曰今竹輿車江表
作竹輿以行云是轎之爲器三代時已有之然皆在南
方且以竹爲之如今甕子之類也其在北方則有輦詩
云我任我輦說文輦挽車也從車從扶音扶在車前引

之則如今之手輓車也手輓車其下有輪非如後世之肩輿也然左傳欒盈將爲亂范宣子使二婦人輦以如公宮南宮萬自宋奔陳以乘車輦其母一日而至則古時惟婦人始得乘輦其非婦人則雖天子亦皆乘車故周穆王猶用八駿呂氏春秋出則以車入則以輦此或秦制有用輦者尙非肩輿也史記漢初天子不能具鈞駟將相或乘牛車又凡徵召賢士多用安車蒲輪而黃霸爲揚州刺史治行第一賜車蓋特高一丈宣帝時蔡義給事將軍幕府家貧常步行門下客共爲買犢車可見西漢百官皆乘車或貧不能具馬則以牛駕車陰就以人輦爲井井所叱則東漢亦皆乘車也魏晉以來財

乘革而改用犢世說石崇王愷並遊日晚爭入洛陽崇
牛數十步後迅若飛禽愷牛絕走不能及又太平廣記
王導懼妻妬私置衆妾于別館妻曹氏偵知率婢僕二
十餘人持刀欲出導遽命駕覲以麈尾柄助徇者打牛
乃得先去宋書何偃乘在前劉瑀在後瑀謂偃曰君轡
何疾偃曰牛駿馭精故耳朱修之拜戶部尚書牛奔墜
車折脚乃辭尚書南齊書陳顯達諸子並精車牛當世
快牛稱陳世子青王三郎烏呂文顯折角江瞿曇白鼻
而皆集陳舍南史高悝於張侯橋浦中得金佛像載之
長干巷牛不肯進乃令牛人任牛所之牛竟至阿育王
寺梁武當齊明帝世避猜忌嘗乘折角小牛車劉之遴

夢當爲折臂太守後牛奔墮車傷在天遂與郡旗延之
常乘羸牛車路逢其子竣鹵簿卽屏住道側以愧之北
史晁崇傳道武尅姚平時牛大疫道武所乘車巨牯數
百亦同日斃彭城王勰遇禍時被召入東掖門牛不肯
進乃去牛而人挽以入明山賓家常乏用因貨所乘車
牛旣售仍告以牛漏蹄北齊書中尉山清道王公皆遙
住車去牛輒頓地俟其過隋書牛宏弟弼醉射殺宏駕
車牛宏還宅其妻迎謂曰叔射殺牛宏無所怪但云作
脯是六朝時上自天子下至士大夫皆乘牛車所謂短
轂犢車長柄塵尾亦一時風尙使然也然其時南朝亦
間有乘肩輿者晉書陶淵明令一門生兩兒舁輿宋書

武帝與范泰登彭城泰有足疾特命乘輿檀道濟伐魏
歸兵少敵衆乃令軍士悉甲身自乘輿徐出外圍南史
桂陽王休範反乘肩輿至壘南江夏王寶元反乘八摑
輿手執絳麾幡隨崔慧景至都王敬則起兵至武進陵
口慟哭乘肩輿而前垣崇祖守壽春魏人攻之崇祖肩
輿登城手決堰水魏人溺死無算梁天監中益州民焦
僧護作亂蕭淵藻年未弱冠自乘肩輿巡行賊壘擊平
之又韋叡體素弱未嘗乘馬每戰常乘板輿督勵將士
勇氣無敵是皆六朝已乘肩輿之證蓋轎本南俗浸尋
而及於王公士大夫或私用之尚未著爲定令耳唐都
長安承北朝之制百官皆乘馬唐書劉知幾議釋奠儀

曰古大夫以上皆乘車以馬爲駢服魏晉後以牛駕車
江左尚書郎輒乘馬則御史劾之顏延年罷官乘馬出
入世稱放誕此乘馬宜從褻服之明證今陵廟巡謁王
公冊命士庶迎娶則盛服官履乘輅車他事無車故貴
賤通乘馬比者法駕所臨侍臣皆馬上朝服非惟不帥
於古亦是取驚流俗是唐初官僚皆乘馬李靖與侯君
集同還省君集馬過門數步乃覺靖知其有異慮武元
衡爲相遇盜被刺馬歸始知之裴度馬上被斫擅帽厚
得不死猶斷鞅而去程大昌演繁露亦記唐時朝官出
使皆乘驛馬間有乘擔子者夫皆乘雇是皆乘馬不乘
僑之明證然亦已有乘肩輿者馬懷素褚無量侍講讀

於禁中許肩輿至內館苗晉卿年老許肩輿至中書此
皆特典其後張宏靖鎮幽州用人輿出入楊復恭乘肩
輿至太極殿又文昌雜錄令狐綯薦裴坦知制詔非裴
休意也坦入時見休愧謝休曰令狐丞相之舉休何力
乃顧左右肩輿而出北夢瑣言杜審權出領江西乘肩
輿出都門生餞別於灞橋五代史後唐莊宗將稱帝張
承業自太原肩輿至魏極諫又莊宗以盧程爲相拜命
之日乘肩輿導從喧呼莊宗聞之以問左右對曰此宰
相擔子入門宋史李穀爲周太祖相以病乞致仕周祖
不許賜白藤肩輿召至便殿勉諭然則宰相及大臣乘
肩輿蓋自唐初有特恩賜者其後自相沿倣漸以成習

沿及五代遂爲常制也宋初百官亦乘馬王旦有控馬
卒年滿辭去公問以控馬幾年曰五年公曰吾不省有
汝旣去又呼問曰汝乃某人乎蓋逐日控馬但見其背
未見其面至是因其去而見其背方省也劉貢父初入
館乘一騾馬或規之劉欲以青布作小檐繫之尾後曰
吾俸入儉薄因就廉值取此馬以代步不意諸君督過
之深姑爲此以掩言者之口耳王荆公在金陵嘗乘驢
或有進肩輿者公怒曰奈何以人代畜是可見北宋時
百官乘馬之制建炎朝野記云東都舊制者德大臣或
宗室尊行者特恩許乘肩輿高宗至磁州宗澤以所乘
輜進黑漆紫褥上却之以舊制在京百官不用肩輿所

以避至尊高宗是時未卽位故却不御也

按宋高宗有乘轎之制歟

有乘轎之制歟

建炎元年上駐蹕維揚以輓滑許乘轎程史謂唐

宰相皆乘馬五代始用擔子本朝惟文潞公年高以大師平章軍國司馬溫公以病不能乘騎乃許乘擔子雲麓漫抄亦云故事百官入朝並乘馬政和三年十二月十一日以雪滑暫許乘車轎不得入宮門候路通仍依常制高宗南渡後方乘轎遂相沿不改是近代乘轎實始于宋南渡也筌翁貴耳集云自渡江以前無今之轎只是乘馬洪容齋記紹興三十年爲參詳官各乘馬赴貢院至淳熙十四年司貢舉則乘轎者十人而九矣蓋南方本少馬且輓石斃地不便乘騎而又無朝廷明禁

遂不覺日趨于安逸耳朱國禎云明初三品以上乘轎
四品以下乘馬在外自大使以下皆乘馬武官勲戚亦
如之惟年老公侯及拜三公者賜轎然後得乘嘉隆以
來南京無大小皆乘輿惟有兩人四人之分而北京亦
用肩輿出入卽兵馬指揮亦然在外惟典史乘馬恐不
久亦當變矣明史霍韜傳南京給事中曾鈞騎馬不避
尙書劉龍潘珍轎龍鈞互訐奏霍韜因劾鈞且請禁小
臣乘轎廷議如韜奏而南京給事御史乘轎自如又嘉
靖中郭宗臯爲巡按行部乘馬不御肩輿以不御肩輿
卽爲美談至入之本傳則其時皆御肩輿可知王新城
池北偶談云今江寧開封各官皆用暖轎施帷餘省各

官不施帷蓋猶有古褻帷之意云

養濟院育嬰堂義塚地

顧寧人謂漏澤園之設起於蔡京不可以人而廢法按宋史徽宗紀崇寧元年置安濟坊養民之貧病者仍令諸郡縣給養二年又置漏澤園夷堅志亦云崇寧間設孤老院以養孤老安濟坊以養病人漏澤園以瘞死者通鑑亦謂崇寧間置居養院安濟坊漏澤園朝廷課以爲殿最諺曰不養健兒却養乞兒不管活人只管死尸計其時正京當國是以顧寧人謂起于京然管子入國篇凡國都有掌孤凡孤幼不能自生者屬之其親戚故人養一孤者一子無征養二孤者二子無征有痼疾不

能自存者官收而衣食之是恤孤養疾本屬古制南齊書文惠太子與竟陵王子良俱好釋氏立六疾館以養窮人梁書普通三年詔置孤獨園以恤老幼後魏書宣武詔太常立一館使京畿內外疾病者咸令居處便醫治之舊唐書武宗紀廢天下僧寺尋以悲田養病坊以僧尼還俗無人主持恐殘疾無以自給乃命兩京量給寺田諸州或七頃或十頃擇本處耆老勾當

蓋唐時養病坊屬寺僧經營

是恤孤養疾六朝及唐已著爲令甲而宋史蘇軾知杭州哀羨緡二千黃金五十兩作病坊以處病者常惲知廣德軍亦置慈幼局則宋亦已有之在蔡京之前其漏澤園之設月令已有掩骼埋胔後漢書桓帝紀詔京師

死者相枕若無親屬者可于官墻地葬之表識姓名爲
設祠祭則後漢亦早有些制而宋初又已著令貧無葬
地者許以官地安葬見于范同奏疏天禧中于京城外
四禪院買地瘞無主骸骨每具官給六百文幼者半之
見韓魏公君臣相遇傳又宋仁宗紀嘉祐七年詔開封
府市地于四郊給錢瘞貧民之不能葬者神宗紀元豐
二年詔給地葬畿內寄歿之喪無所歸者官瘞之韓魏
公鎮并州日亦以官錢市田數頃給民安葬是義塚之
法蔡京前已有之亦不自京始也蓋京特踵其法遍行
州郡以沽譽并入之課程耳葉石林守許昌日有押運
使宋昇以營造西內需用灰布竭牛羊骨不足至取漏

澤園人骨屑灰用之其時正京在朝若果力行善政則
權相方設園瘞骨臣下敢卽取骨作灰乎寧人亦未加
深考而謂善政之始于京不免爲京所欺也又宋淳祐
七年創慈幼局乳遺棄小兒民間有願收養者官爲倩
貧婦就局乳視官給錢米此又後世育嬰堂之始香祖
筆記杭州養濟院祀嚴嵩爲土地神說者謂嵩籍沒後
寄食于養濟院而死故祀之于院按清波雜誌蔡京死
于潭州數日不得殮以青布裹屍藁葬漏澤園然則京
亦可祀于漏澤園爲土地神也歟

咳餘叢考卷二十八

陽湖 趙翼 雲崧

秀才

禮記有秀士漢書賈誼傳河南守吳公聞誼秀才召置門下秀才之名始見於此公孫宏奏博士弟子內有秀才異等輒以名聞是皆謂才之秀者非竟以爲士子之專稱也晉世始有秀才之舉永寧初王接舉秀才報友人書曰非榮比行實欲極陳所言冀有覺悟耳此士子專稱秀才之始元帝時所舉秀才皆不能試經尙書孔坦請展限五年聽其講習詔許之則秀才有不能試經者矣後魏令中正掌選舉其秀才對策第居中上者表

敘之北齊令中書策秀才濫劣者有罰墨汁之例南朝亦重此科王融任昉俱有策秀才文載文選可考也至隋時秀才之舉益重杜正元傳開皇中海內舉秀才杜正元一人楊素曰周孔更生尙不得爲秀才刺史何妄舉如此素意欲試黜之乃手題使擬司馬相如上林賦王褒聖主得賢臣頌班固燕然山銘張載劔閣銘白鸚鵡賦令至末時俱就正元果如期並了素大驚曰誠好秀才後其弟正藏正倫亦舉秀才隋世天下舉秀才不十人而杜氏一門三秀才此其極盛也

亦見唐書
杜正倫傳

唐高宗

永徽二年停秀才科開元十四年以後復有此舉主司以其科廢久不欲獎拔多黜落之其科遂廢封氏聞見

記唐初秀才試方略策三道其後舉人憚於方略之科
爲秀才者殆絕而多趨明經進士然唐時凡舉子皆稱
秀才見李肇國史補又韓昌黎有燕河南府秀才詩其
時秀才之科久停而猶有是稱可見凡鄉貢懷牒就試
於州縣而覓舉者皆稱秀才也容齋隨筆謂秀才名目
魏晉以後爲貢舉科目之最而今俗以爲相輕之稱則
宋時凡應舉者固無不稱秀才矣元虞集爲文宗草詔
謂順帝非明宗子順帝登極欲殺之脫脫在旁曰彼有
文名後世只謂陛下殺此秀才乃捨之洪武中選國子
生才高者命博極羣書以備大用帝呼之曰老秀才可
見元明以來秀才爲讀書者之通稱今俗猶以府縣學

生員爲秀才蓋亦沿舊稱也府縣學生員之制始於明太祖欲令人才一出於學校於是府設教授州設學正縣設教諭各副以訓導其生員之數府四十州縣遞減其十月廩人六斗其後命增廣員數不拘額宣德中又走增廣之額於是初設廩食者謂之廩膳生員增廣者謂之增廣生員正統中因楊纘奏疏又請於額外增取附於諸生之後謂之附學生員

監生

漢時天下之士皆聚于太學蓋太學設五經博士專門名家學有本原故士之嚮學者皆赴之業成者授爲郎及文學掌故此由太學敘用者也其他郡國所舉孝廉

有道及辟署掾史功曹大抵亦太學之人居多是以東漢之末遊學者至三萬餘人唐書儒學傳太宗廣學舍千三百區四方秀艾雲集蠻夷亦遣子弟就學凡八千餘人其後士之試於禮部者先兩監而後鄉貢京兆所錄兩監十名以上小宗伯多倚以爲選登進士第者無慮十之七八語見文獻通考宋制太學有積分之法分上舍中舍下舍以遞爲升黜亦多至數千人而成均試太學生并別有狀元之日癸辛雜誌解褐舍法下等上舍先免解後免省待三年後到殿中等上舍徑到殿或特旨徑行解褐其釋褐恩數優者謂之狀元擇日於崇化堂鳴鼓集衆諸生兩廊序坐狀元襴襖立同舍班俟

揖訖詣堂上香案前望闕謝恩是也明承宋制令天下
擇諸生學行優者送國子監就學以育其才或舉人會
試不第亦聽入監如賈三俊練綱姚顥皆以鄉試舉人人國學楊守陞以鄉試第一入國學楊繼盛舉鄉試卒業國學皆見本傳
而洪武中監生并有奉使採訪民事平理訟獄甚或卽
授布按兩司者洪武二十六年擇國子監生六十四人爲布政使等官明年又遣監生分行天下督吏民修水利其納
粟入監之例自景泰中始朱國禎湧幢小品云近日民
生納粟一途人頗輕之然羅圭峯以七試不第入貲北
雍中解元會元蓋既有此途可以就試則人才亦卽出
其中固未可一概論也

舉人

漢時取士無考試之法皆令郡國守相薦舉故謂之舉

人後漢章帝建初元年詔曰前世舉人貢士或起畎畝舉人之名始見於此今世俗別稱舉人曰孝廉以孝廉本郡國所舉也然漢時舉人名曰甚多如賢良方正文學有道直言極諫茂材異等明陰陽明兵法能治獄有行義之類皆郡國所舉而孝廉特其一途耳今專以此爲舉人之稱蓋孝廉乃每歲所常舉其他則隨時詔舉故也和帝十三年制郡國口十萬以上歲舉孝廉一人不滿十萬二歲舉一人五萬以上三歲舉一人此可見漢時舉孝廉之常制又漢成帝詔北邊二十二郡舉勇猛知兵法者各一人平帝又詔舉武勇有節明兵法者郡各一人此又後世武舉之始也唐宋舉人則又與前

代異前代舉孝廉等卽爲入仕之途唐宋惟重進士一
科所謂舉人者不過由此可應進士試耳故又謂之舉
進士其時士之試於禮部者在內由京兆府考試錄送
李肇國史補所謂京兆府考而升之謂之等第是也在
外由各府申送謂之鄉貢則不復考試國史補謂之拔
解是也至宋則外府解送亦須先試東坡在杭州有監
試呈諸試官詩及催試官考校詩是也按韓昌黎譙河南秀
詩云乃選二千縣試官
得臨生則唐時解送亦須
先試蓋中葉以後之制舉人試禮部不中仍須再應鄉舉宋
史劉章四魁鄉舉又元遺山送靖達卿詩序謂先生曾
以鄉試兩魁鄭州許瑗在至正中兩以易經舉於鄉皆
第一會試輒不利是宋金元舉人皆如唐制但可由此

試進士而不能入仕今鄉試已中者爲舉人卽會試不第亦不必再應鄉舉而并可依科就選此乃前明之制蓋唐宋舉人謂之舉進士並無另設舉人之科前明則鄉試中式者爲舉人會試中式者爲進士遂與進士分甲乙科而舉人并可入仕是以舉人另成一名目也今會試中式者禮部放榜但云會試中式舉人必俟殿試後賜進士及第出身同出身始謂之進士或有事故不及赴殿試者亦同但是中式舉人不得稱進士蓋猶沿唐宋遺制

進士

進士之名見于王制秦漢以來未有此名目也至隋煬帝始設此科唐因之其初雖有諸科然大要以明經進士二科爲重其後又專重進士此後世進士所始也唐初制試時務策五道帖一大經經策全通爲甲第策通

四帖過四以上爲乙策永隆二年以劉思立言進士惟
誦舊策皆無實材乃詔進士試雜文二篇通文律者然
後試策此進士試詩賦之始開元二十五年詔進士以
聲韻爲學多昧古今自今加試大經十帖建中二年中
書舍人趙贊權知貢舉又以箴論表讚代詩賦太和八
年仍復詩賦此唐一代進士試藝之大略也然唐制有
與後世不同者後世三歲一會試唐則每歲皆試後世
放進士多至三四百人少亦百餘人唐則每歲放進士
不過三四十人見通考所載登科記宋初猶每歲一試
仁宗至和二年始定令間歲一科舉英宗二年又定令
三歲一科此後世三年一鄉會之始也

封氏聞見記唐時風尚
最重進士制舉雖高第

主進士之下御史張璪兄弟八人其七人皆登進士一人制科出身每親
故宴集兄弟連榻猶令制科者別一謂之雜色以爲笑樂其時習俗如此南宋

又有類省試蓋因兵興路遠舉子難赴卽就本路權省
試如紹興二年川陝宣撫使類試陝西發解進士得周
謨等十三人以便宜賜進士出身紹興五年又詔川陝
類試進士合格第一人依殿試第三人例推恩餘並賜
同進士出身度宗在諒闇命宰執類試阮登炳以下依
例賜出身則類試并行之於朝廷此又因理宗之喪而
權爲之制也

狀元榜眼探花

世稱進士廷試第一甲三人爲狀元榜眼探花按狀元
之名唐已有之自武后初試貢士於殿前別其等第門

下例有奏狀其居首者因曰狀頭亦曰狀元通鑑唐僖
宗謂優人曰朕若應擊毬進士舉須爲狀頭酉陽雜俎
李固言擢狀元詩賦有芙蓉人鏡之目又鄭谷登第詩
好是五更殘酒醒耳邊聞喚狀元聲此唐時稱狀元之
故事也榜眼探花之名明史選舉志云制所定也似謂
此三種名目係明太祖所定然元人歐陽圭齋記泰定
丁卯狀元至國學謝師榜眼劉思誠探花郎徐容亦拜
於側又高則誠琵琶記亦已有榜眼探花之名則元明
以來固有是稱又按宋史陳思讓傳思讓之孫若拙素
無文中第一名當時以第二名爲榜眼遂以若拙爲榜
榜則榜眼之名起於北宋無疑然魏道輔詩話宋太宗

時宋嚴以第三人及第附舟赴任王禹偁送詩曰賃舟
東下歷陽湖榜眼科名釋褐初則北宋時第三人亦呼
爲榜眼蓋眼必有二故第二第三人皆謂之榜眼其後
以第三人爲探花遂專以第二人爲榜眼耳探花之稱
唐時曲江宴本以榜中最年少者爲之秦中記探花宴
以少俊二人爲探花使遍遊名園若他人先得名花則
二人被罰宋初猶然翰苑名談西方琥登第年最少告
狀元鄭毅夫乞作探花郎毅夫云已差二人琥曰此無
定員添一人何害是宋初尙未以第三人爲探花揮麈
錄李宗諤之子昭遘十八歲登第昭遘子杲卿杲卿子
士廉三世皆以是年爲探花郎是亦謂三世登第皆十

八歲故俱以年少爲探花郎而非必三世皆第三名及第也戴埴鼠璞云本朝故事吳旦榜馮拯爲探花太宗賜詩曰二三千客裏成事七十四人中少年蔡寬夫詩話亦但言期集所擇少年爲探花而今獨以稱鼎魁不知何義戴埴係宋末人而其說如此則宋南渡後固以

第三人爲探花矣按宋時一甲不止三人

洪容齋隨筆記真宗三年一甲陳堯咨以

下六人授將作丞四十二人授評事第二甲一百三十四人授節度推官及軍事判官第三甲八十人防團軍事推官又稱聖俞喜謝師厚及第詩自註一甲二十八人君名在二十三又夷望志淳化三年太延唱名時宮中適生皇子上喜顧謂侍臣曰第一甲可多放幾名遂以次傳臚上意亦忘之至三百名方悟遂曰止是歲孫何爲狀頭而一甲有三百人而三人爲最重蘇老泉云今進士三人之中釋

褐之日天下望爲卿相不十年未有不兩制者蘇子瞻送章子厚序亦云仁宗朝十三榜數其上之三人凡三

十有九人其不至于上卿者九人而已則是時一甲雖不止三人而以三人爲貴重可知周密唱名記第一名承事郎第二三名文林郎第一甲賜進士及第二甲同進士及第三四甲賜進士出身五甲同進士出身其制與今徵有不同然一甲三人卽授承事文林之階近代一甲三人先授職之制所由昉也

按宋史呂蒙正傳中進士第一授將作監丞秩九品是朱初狀

元授職尙不過九品官

宋史蔡齊舉進士第一儀狀俊偉真宗特命金

吾給七騶傳呼以寵之此又後世狀元列仗遊街之制所由昉也金宜宗記詔詞賦進士第一甲第一人特遷奉直大夫第二人以下及經義進士第一人並儒林郎第二甲以下徵仕郎同進士出身從事郎經童將仕郎

則經制視宋較優元史張起巖延祐乙卯進士第一除同知登州事特旨改集賢院修撰至治元年宋本廷試

第一亦即授修撰此又近代狀元授修撰之始也

按練子寧洪武

十年一甲第二名授修撰其後胡廣王良李貴三人皆一甲亦皆授修撰則明初修撰不止授狀元一人又天順中檢討邢讓以修實錄進修撰成化中楊廷和亦以檢討進修撰則修撰本翰林中官各非專為狀元授也續通鑑註云第一名從六品第二名以

下及第二甲正七品三甲正八品此又近代狀元從六

品之始也又元時一甲者皆賜及第順帝癸酉稍變其

制賜一甲三人及第餘賜出身同出身此又後世以三

人為及第二甲為出身三甲為同出身之始也

元史宋本傳本充請

卷官增第一甲為三人豈元時廷試一甲止二人至本而增至三人耶傳恐誤

元人宋聚有登第詩五首內

賜章服一首自註云自泰定元年甲子科始賜幘頭花

帶靴銀木簡皆具簡上仍刻御賜字金填之明史吳伯宗傳洪武四年伯宗廷試第一時開科之始帝得伯宗甚喜特賜冠帶袍笏此又近代狀元賜冠服進士賜袍綬之始也湧幢小品明洪武二十一年廷試上親擢任亨泰第一命題名於石建坊以寵之此又近代狀元等建坊之始也明史曹鼐傳新進士賜宴禮部由宣德八年始此又近代賜宴禮部之始也

王闢之灕水燕談錄宋時新進士賜宴賜詩自太平興國二年

呂蒙正榜始分甲第及賜同出身自太平興國八年王世則榜始賜袍笏自祥符中姚暉榜始唱名自雍熙二年梁顥榜始彌封謄錄始于景德祥符之間

三元

撫言唐大中中張又新號張三頭謂進士狀頭宏詞敕頭京兆解頭也說儲又載唐崔元翰京兆解頭禮部狀

頭宏詞敕頭制科三等敕頭則并中四元矣宋史列傳第七十六卷論謂宋進士自鄉舉至廷試皆第一者王曾宋庠爲名宰相馮京爲名執政是宋時中三元者共有三人然王巖叟傳以明經科鄉舉省試廷對皆第一則亦一三元也但明經非進士科耳至孫何傳舉進士開封府禮部俱首薦及第又得甲科則進士科三元又有孫何矣楊寘傳舉進士京師試國子監禮部皆第一廷試時仁宗臨軒啓封見名喜動顏色遂擢爲第一則寘亦三元也

宋史論但稱王曾等三人而何寘二人俱不及蓋以何寘並未

宣達耳按何官至知制誥掌三班院而寘傳云其友夢寘作龍

首山人寘自謂龍首我四冠多士山人無祿位之稱其終于是乎已而果卒

金史楊伯仁傳孟宗獻發解

第一伯仁讀其程文謂當成大名是歲宗獻府試省試

廷試皆第一時稱為孟四元蓋金時尙多一府試也

見歸

志及中州集

輟耕錄元時三元一人王宗哲字元舉至正戊子

科三元進士為湖廣憲僉後降于賊有弔四狀元者曰

四榜狀元逢此日他時公論定難逃空令太守提三尺

不見元戎用六韜元舉何如兼善死

秦不花死台州

公平

李齊為高郵知府說

張士誠後被戮

爭似子威高

李黼死工州

世間多少偷生者黃甲由來出

俊髦陶九成云論優劣江州第一台州次之高郵又次

之憲僉不足道也則王宗哲愧此三元矣明史商輅傳

輅舉鄉試第一正統十年會試殿試皆第一終明之世

三試第一者輅一人而已然雜憲剩言記黃觀洪武甲

子南京解元辛未會試第一廷對禦戎策太祖擢置狀

元後殉建文之難亦見傅維麟明書忠節傳則洪武中已有一人不獨商文毅也

按明史黃觀傳但云以貢入太學洪武二十四年會試廷試皆第一而不言鄉試亦第二

又選舉志亦謂三試第一明代惟商輅一人則觀又似止會狀兩元而非三元

本朝百餘年來未有中三

元者乾隆四十六年辛丑科蘇州錢棨以己亥解元掇辛丑會狀遂備茲盛事蓋氣運鴻朗久道化成是以靈秀呈露蔚爲上瑞於此可以覘文明之治也

按聞見錄歐陽修以監元省元赴廷試銳意魁天下及唱名乃王拱辰第一明人小說王鏊以解元會元赴廷試人皆必其三元會商文毅閱卷不欲人與己同乃置之第三此皆兩元而不得狀頭者

兩次及第

金史鄭子聘初中天德二年進士一甲第三人及第已
官書畫直長矣自負其才以不得第一人爲歎海陵怒
乃令與進士雜試果以一甲第一人及第乃授翰林修
撰本朝有馬提督名瑑山西人先中壬申科武進士
一甲第三名及第後爲叅將緣事罷官再應試中庚辰
科武進士第一名及第一文一武何其數百年如一轍
也

特賜進士

封氏聞見記李林甫壻王如泚以伎術供奉元宗欲與
改官林甫奏如泚現應進士舉乞聖恩與一及第上許
之付禮部與及第侍郎李暉曰明經進士國家取才之

地聖恩優異焉可與官不宜與第如泚方賓朋讌集
中書下牒禮部王如泚可依例考試乃皆愕然失措
見唐時未有賜進士者唐末始有追賜及第之例通鑑
紀事宰相張文蔚奏名儒不遇者方干等五人請賜及
第以慰其魂然此乃加恩於已歿之落第舉子非現在
之舉子也天復元年令新及第進士中有久在名場年
齒已高者不拘常例各授一官於是陳光問曹松等皆
以年老授秘書省正字等官此又加恩於及第進士內
之老者而非落第之老舉子也未時始有特奏名之例
年老者或得賜同出身其後有不比年老而亦賜者神
宗紀賜布衣陳知彥進士出身是也又有他途出身

爲達官而特賜進士出身者神宗紀賜知縣王輔同進士出身理宗紀以史宅之爲太府少監史宇之爲將作少監並賜同進士出身趙葵同知樞密院事賜進士出身李曾伯爲四川宣撫使兼京湖制置大使賜同進士出身德祐中謝堂知樞密院事賜同進士出身是也金制已爲顯官特賜進士者又必定爲某科進士如移刺履明呂初禮部尙書兼翰林直學士特賜大定三年孟宗獻榜下進士及第韓錫天德中爲尙書工部員外郎特賜胡礪榜下進士及第胥持國拜叅知政事特賜孫用康榜下進士及第是也又有武職賜文進士者宋史曹勛傳勛以恩補承信郎特命赴進士廷試賜甲科爲

武吏如故此尤累朝所無也我朝曠蕩之恩時施格外康熙年間如查慎行以供奉勞由舉人賜進士莊令輿等以五經由監生賜舉人

今上每遇恩科加恩年老者尤渥鄉試被黜者特賜舉人會試不第者或授翰林檢討等官以榮其身此又千古未有之曠典矣

棘闈

貢院四圍重牆皆插棘所以杜傳遞出入之弊古制則非爲此也五代史和凝傳是時進士多浮薄喜爲喧譁以動主司主司每放榜則圍之以棘閉省門疑知貢舉撤棘開門而士皆肅然無譁所取稱爲得人然則設棘

乃放榜時以防士子喧噪耳

禮部知貢舉

唐初明經進士皆考功員外郎主試事開元二十四年考功員外郎李昂爲舉人詆訶帝以員外郎望輕遂移貢舉于禮部以侍郎主之後世禮部知貢舉自此始然其時知貢舉者卽主司後世則知貢舉者但理場務而主試則別命大臣按唐制知貢舉亦有不專用禮部侍郎而別命他官者德宗時蕭昕以禮部尙書知貢舉則不必侍郎也又以國子祭酒包佶知貢舉憲宗時以中書舍人李逢吉知貢舉穆宗時以中書舍人李宗閔知貢舉武宗時以太常卿王起知貢舉宣宗時以中書舍

人杜審權知貢舉五代時或以他部尙書侍郎爲之
此又近代別命大臣主試之始也又唐時知貢舉大臣
有不必須進士出身者舊唐書李麟傳麟以蔭入仕不由
科第出身後爲兵部侍郎知禮部貢舉又李德裕與李
宗閔有隙杜悰欲爲釋憾謂宗閔曰德裕有文才而不
由科第若使之知貢舉必喜矣是唐制非科第出身者
亦得主試也

殿試

唐武后天授元年二月策問貢舉人於洛陽數日方畢
此殿試之始也然其制與後世異其時舉人皆試於考
功員外郎武后自矜文墨故於殿陛間行考功主試之

事是殿試卽考功之試非如後世會試後再赴殿試也
武后以後其事仍歸考功無復殿試開元中改命禮部
知貢舉故知貢舉者所放第一卽爲狀元撫言記裴思
謙以仇士良關節謁禮部侍郎高錡求狀頭曰非狀元
請侍郎不放是也穆宗時始令知貢舉官先以所取及
第進士姓名文卷申送中書官然後放榜然亦第令禮
闈所取試卷具送中書覆閱非另于殿陛再試也宋太
祖開寶五年禮部試到進士安守亮等上名對講武殿
始下詔放榜此殿陛放榜之始六年李昉知貢舉有徐
士廉伐鼓訟冤上乃御講武殿籍終場舉人再試詩賦
命殿中侍御史李瑩等爲考官得進士二十六人并昉

所取皆賜及第則殿試實自宋太祖始

通考謂昉所取者仍皆賜及第文昌雜錄謂昉

所取者覆落十八青昉昉太常少卿

然是科殿試尙合被黜舉人再試以定去

取非專試知貢舉所取士也八年又試貢院合格舉人王式等於殿內以王嗣宗爲首而王式爲第四自此省試後再有殿試遂爲常制元時無殿試但省試後再試於翰林國史館耳洪武中仍復殿試之例

宋史范鎮傳故事廷試唱名過第三則禮部試第一者必越次抗聲自陳得置上列吳育歐陽修亦爲之鎮獨不然至第七十九人乃聞呼出應自是此風遂

革

武科殿試

武科始于成化十四年太監汪直奏請武舉設科鄉會試如進士例尙未有殿試也崇禎四年因武會試中式之王來聘徐彥琦俱能運百斤大刀及榜發二人不與選乃下考官獄特命詞臣倪元璐等覆閱取百人視文榜例分三甲傳臚賜宴以前三十卷進呈欽定一甲三人來聘居首卽授副總兵武榜有狀元自此始後來聘感上恩攻登州城中傷死一甲第三名賀秉鉞爲叅將崇禎十六年扶父柩至臨清與大清兵巷戰死王阮亭記是科因考官方逢年之奏故行殿試云按武舉漢已有之如成帝詔北邊二十二郡舉勇猛知兵法者各一人是也唐武后長安二年又設武舉之科其後郭子

儀亦由武舉出身但未有殿試之例殿試實自宋始通鑑神宗熙寧六年九月初策武舉之士先是武舉試義策于秘閣武藝于殿前司殿試則又試騎射又策于庭策武藝俱優爲右班殿直次優爲三班奉職又次借職未等樞密院初議不能對策者答兵書墨義至是因王安石言始策武舉之士哲宗紹聖四年御集賢殿策進士明日策武舉孝宗時又命武舉廷試依文舉例給黃牒榜首武舉及第餘並賜武舉出身是宋時原有武科及武殿試之例蓋至元時已廢迨明成化始復武舉崇禎中又復殿試之例耳

試期

沈作喆寓簡宋初發解進士率以秋季引試無定期故
諸子多古隣近戶籍至有三數試者冀于多試之中必
有一得紹興中乃定諸州科場並用八月一日鎖院十
五日引試夷堅志春試向例在正月淳熙十四年庚戌
以首春雪寒恐遠方來者愆期特展半月此宋時秋試
在八月春試在二月之淵流也元仁宗因李孟言亦定
以八月鄉試二月會試其期鄉試八月二十日頭場二十三日二十六
日為二場三場會試二月初一日為頭場初三
日初五日明因之八月初九日頭場十二日二場十
五日三場二月會試日期亦同萬歷戊戌御史
喬璧星以舉子重裘而進便于懷挾請改期于三月用
單袂衣則弊可清李九我駁之張幼于亦有會試移期
議一篇謂國初定鼎金陵在南北之中故定期二月會

試後都北京遠三千里宜移在三月

俱見湧
童小品

然終明之世

未嘗改移也至

本朝始改三月遠方士子旣免匆遽

而天暖無呵凍之苦衣單無懷挾之弊最爲善政至殿

試之期元時在三月初七日明初在三月一日謝恩在

初六日成化八年改在十五日後遂爲例然二月會試

而三月朔卽殿試則禮闈中閱六爲日無幾豈不太促

本朝殿試在四月二十五日傳臚在五月朔日乾隆

二十六年辛巳科奉

旨改四月二十一日殿試二十五日傳臚



